

MARKO

Kaviyak o Joowo o Ayheet Marko

Uuwayi o Jɔn o oony

1 ¹ Nici kanaan ci kaviyak o colai akati Yesu Kiristo ween ɲeerti Joowo. ² Akanai zin ebaal ayeedi nyakaɲani o kazi Izaya zɔɔz o aduwa Jooi waanbaal ane ne, “Ɔaan tiɲeere kitoon gabaren can rak karaye ineet ɔɔwa ka kook kidimdimen ɔl. ³ Ma aku agereny eeti nici balala azi ne, Idimdimantek eleeti ɔl o Manyi. Amadek nɔɔnɔ golok ogin keelit tɔp.”

⁴ Zin mazi aku Jɔn e, iiya abaak niini balala, ma uuwak gi ci ka kabadai ɔl oɲene ka kotoonye niigi ka kaara Jooi oɲe ugeec.

⁵ Zin enice ivitak ɔl dook Jɔn looce o kazi Judiya ki kuture o kazi Jerusalem ka kiziiyit nɔɔnɔ, ma avu abɔra niigi oɲe ugeec, ma oony Jɔn nɔɔɔɔ liile o kazi Jordan.

⁶ Maje Jɔn waanice amalik rum ci agɔɔnnyai imane ci nyakalo been kavali ceen ruceen barkonya. Ma adak niini giroc been lete ci ajowa tuuwa.

⁷ Ma uuwak niini waanice zɔɔz ci azi ne, “Vurte can anyak tiɲeere eet ci aku ci adiɲɲiɲ kujukan aneet. Ma alaɲ kaganona naana ɲaati kaborcane nɔɔnɔ caava ogin zoonu, eeci adiɲɲiɲ niini ɔɔɔɔ ɲaatan. ⁸ Inoko kuunyuy naana igeet maami doon, aje bar niini ɲaan aku uunyuy igeet Vɔɲize o Joowo.”

Onyen o Yesu been cinan onin

⁹ Ma iinyaye niceke iiya Yesu kuture o kazi Nazaret abil looce o Galili, ma ako oony Jɔn nɔɔnɔ liile o kazi Jordan. ¹⁰ Mazi ako aduɲna Yesu maami, enico ele ɔkɔle tammu keɲ, ma acin niini Vɔɲiz o Joowo akunak nɔɔnɔ kiyo yeelac o. ¹¹ Ma azi mɔlɔyi ci aku tamma ne, “Een niina ɲeeran o kareezin neen. Katalne naana ɲaatan ɔɔɔɔ.”

¹² Enico ele itoonek Vɔɲizi o Joowo Yesu balal. ¹³ Ma ako aavi niini balala ɲinaante iinya eet ram, ma acina Loryenti nɔɔnɔ. Maje ɲinaante anyak kelek ci too, bar zin ivita itiritit toonnyawa o Joowo nɔɔnɔ.

Akana Yesu liɲliɲɔn onin

¹⁴ Mazi ako acap ɔl Jɔn, itiɲa Yesu ook Galiliya, ma ako uuwak kaviyak o Joowo ɲinaante. ¹⁵ Ma anek niini ɔl ne, “Inoko iiya iiteni, ma izi buk baliin o Joowo aɲɔn. Otonɲit zin oɲe ugoocok agoonu, bar ivita utuweec kaviyak o Joowo abon.”

Awa Yesu ɔl ci detiinto een wec

¹⁶ Mazi ako awɔ Yesu liile o kazi Galili otoga, icinun niini ɔl ceen ram, Saiman kibeem ɔtɔni ci kazi Andoru. Adet niigi kuluk cabaya. ¹⁷ Ma anek Yesu nɔɔɔɔ ne, “Unuyawaɲ. Ɔaan kako kademzekuɲ naana igeet ɔl ci ka edetake ɔl Jook.” ¹⁸ Enico ele otonɲit niigi cabayet ugeec, ma ano nɔɔnɔ.

¹⁹ Mazi iicak niigi ɲintimiliny, icin bodo Yesu Jemis ween ɲeerti Zebedi ki ɔtɔni o kazi Jɔn. Aavtiz niigi kavoole abutan cabayet ugeec. ²⁰ Mazi acin Yesu nɔɔɔɔ, otowa enico ele. Ma oonɲek niigi baatineɲ Zebedi kavool ki ɔl o liɲliɲɔnto, ma ano niigi Yesu.

Eet ci anyak miniɲ ci Loryento alya

²¹ Ma avunak Yesu ki nuyak nicoko kutur o kazi Kapernam. Ma iitene o yubzento kazi Sabit, ook Yesu ceeze o lotento, ma ako ademz niini ɔl ɲinaante. ²² Ma abiir ɔl o azii nɔɔnɔ ooti gole ci ademzi niini nɔɔɔɔ o, eeci demziin cine o alaɲ atobɔ ki demziin ci alaat o ademzek ɔl lotinok, bar ademze niini kizi eet o didi anyak doyiz.

²³ Ma ɲintimiliny nɔkɔ, iiya eeti ci anyak miniɲ ci Loryento ceez o lotento, ma agereny miniɲa nici eete nico molowe ci appe azi ne, ²⁴ “Yesu o kutur o Nazaret, aroon ɲaatinaaɲ naa? Akun o ka ija uulalet? Kagayin naaga ineeta nɔkɔ akun niina Joowa.”

²⁵ Ma agerneyek Yesu nɔɔɔɔ anek ne, “Ajaktɔ. Udunda bitaala eete nico.”

²⁶ Ma amɔɔni miniɲa nici eet nico kabarit kedekedek, ma agereny niini molowe ci appe, ma aduɲna miniɲa nici ɲaatin.

²⁷ Ma abiir ɔl ooti tet, ma ajino niigi maany ano ne, “Mayo gitaz nici? Demziin ci colai? Eeti nici anyak doyiz ci agerneyeke miniɲ o Loryento, ma azii niigi nɔɔnɔ.” ²⁸ Taman nɔkɔ iziiyit ɔl gi ci agɔɔn Yesu noko looce o Galili dook.

Atirit Yesu ɔl ci meelik

²⁹ Mazi aduɲna Yesu ki nuyak ceeze o lotento, ɔɔɔ niigi ole o Saiman ki Andoru. Ma ɔɔkɔr buk niigi ki Jemis been Jɔn. ³⁰ Maje inyik o Saiman amɔɔr anyak tadiwɔn ci ɔɔɲe kuwena nɔkɔ. Taman nɔkɔ mazi arum Yesu ɲinite, uduktak ɔl nɔɔnɔ mɔɔriz cin o.

³¹ Ook ni Yesu ɲaatin, ma ako agam nɔɔnɔ aziit, ma adɔɲa kaavu jena. Enico ele izi maya, ma agoonek niini nɔɔɔɔ dayiin.

³² Mazi ako ii loota yomana, anyaaktak ɔl Yesu ɔl ci meelik amɔɔr kibeem buk ɔl ci anyak miniɲ ci Loryento. ³³ Ma avu ɔl dook kuture nice, ma alotonek ceez ci ona aave Yesu o reerun. ³⁴ Ma arogoz niini ɔl ci meelik anyak moorizok keɲti dook. Ma atɔk niini miniɲ ci Loryento ole ci meelik. Ma alaɲ anyek niini miniɲ o Loryento kozoozit, eeci aga niigi nɔɔnɔ niini ɲeneen.

Uuwak Yesu Galiliya

³⁵ Ma ɲeere ririwɔna icine Yesu, ma adun ako ɲaati akɔm ɔl, ma ako aɲarye niini doon ɲinaante. ³⁶ Ma vurta itingazɔ Saiman kibeem ɔɔɔɔgi ooggi, ma avɔ arɔɔɲ nɔɔnɔ. ³⁷ Mazi avɔ ajowa niigi nɔɔnɔ enektek ne, “Ajal ɔl dook aroonnyin ineeta.”

³⁸ Bar abedeke Yesu nɔɔɔɔ anek ne, “Abon rak kavɔ naaga kuturyowe ogen ajonun ɲaato ka kook buk kuuwak ɲinaante, eeci nici gi o kakunai naana laadun neen.”

³⁹ Ɔɔɔ ni niini, ma ako ɔɔɔp looc o Galili dook. Uuwak ceezine o lotento, ma atɔk miniɲ o Loryento ole ci meelik ɲinaante.

Arogoz Yesu eet ci anyak mɔɔriz o gidan

⁴⁰ Ma akunak ɛeti ci anyak mɔɔriz ci gidan Yesu, ma aku aavek nɔɔnɔ loota kɔpɔkɔk, ma ilalek anek ne, “Manyi, m̄ aroon rogozan kizi maya, rogozan.”

⁴¹ Ma awucnek Yesu zɔɔz nici, ma ataadek nɔɔnɔ aziiti, ma anek ne, “Nyan kitiritin. Inoko ɔkɔma mɔɔriz nico ɲaaton.”

⁴² Taman nɔkɔ izi didi ɛeti nici maya mɔɔriza kigirgir ɛle onine.

⁴³⁻⁴⁴ Ma aricanek Yesu eet nico anek ne, “M̄ akɔ aduwai eet oma gola gi nico. Bar dicek bitɔ yelek ɛle alaan o ceez o Joowo ka kagayin ɔl dook didi inoko ize niina maya. Buk bitɔ taap Jook eo aduwan lotinowa o Mosis.” Anyek ni Yesu nɔɔnɔ kɔtɔɔ.

⁴⁵ Bar mazi akɔ niini ɔlɔ, ook enek ɔl ci meelik ne, “Yesu neen o anyan aneet kizi maya.” Ma giye nico alaɲaan Yesu ayelzak ɔl ɛle kuturyowɛ. Bar aavu niini balala ka kɔɔt ɔl o avu kuturyowɛ dook ɲaatin ɲinaante.

Arogoz Yesu eet ci rebrebi

2 ¹ Mazi amiironek Yesu Kapernam iinyaye ogen, iziyyit ɔl nɔɔnɔ iyyak kɔrɔk. ² Ma alotai ɔl ci meelik ɲinaante, ma abitiz ceez eecitɔ kibeen bitaala buk kɔkɔm ɲinti karek zooc kina. Uuwayek ni Yesu nɔɔgɔ zɔɔz o Joowo. ³ Ma avu ɔl ceen wec anyaak Yesu eet ci rebrebi. ⁴ Mazi avɔ acin niigi meeɛle ɔl, ma akɔm gɔl ci ka kurumti eet nico Yesu, ootoodi niigi nɔɔnɔ ceez taden, ma avɔ akɔl ceez ɔɔ, ma abɔrane nɔɔnɔ ceez ɔɔ kuwena kolocak Yesu ɲaati ona aave o.

⁵ Mazi acin Yesu nɔɔgɔ atuwe ɔrɔɔt nɔkɔ, enek eet ci rebrebi noko ne, “ɲɛeran, aaryai oɲe ugune.”

⁶ Maje ɲinaante anyak ɔl o gɔɔn ademzek gɔnɔgi lotinok, ma abaaban niigi zinzeetine gi ci anɔ ne, ⁷ “Azɔɔz ɛeti nici nɔkɔ naa? Amomoz niini Jook. ɲɛneen ci anim kaara oɲe? Alaɲ een Jook doon?”

⁸ Maje Yesu aga baabani cineeɲ o nɔkɔ, ma anek nɔɔgɔ ne, “Akɔ ma abaabanu gi nico nɔkɔ o naa? ⁹ Yo aboke ɲaatonooɲ ɲaati kanekɛ eet ci rebrebi noko ne, Aaryai oɲe ugune, yo da aboke ɲaati kanekɛ nɔɔnɔ ne, Tiɲa jena. Doma kuwen cun o, tɔ. ¹⁰ Karooɲ zin inoko keyeleyuɲ igeet ka agaac niiga keen naana ɲɛerti Eeto, ma kanyeɛi dɔyiz loota ɲina ci kaarane oɲe ɔla been ci karogoze ɔl mɔɔrizɔi.”

¹¹ Enico enek niini eet ci rebrebi noko ne, “Tiɲa jena. Doma kuwen cun o. Bitɔ ɔlɔ.”

¹² Ma iɲaaz didi niini jena ɔl keberen nɔkɔ, ma adoma kuwen onin, ma awɔ. Mazi acin ɔl eet o rebrebi e awɔ didi, ibiirit nɔɔgɔ ooti, ma anaat Jook, ma anɔ ne, “ɲaanbaal reen laadun ɲaan kicinɛt gi ci abil nɔkɔ been neen.”

Awa Yesu Livai

¹³ Zin imiirezek Yesu bodo liil o Galili. Ma avunak ɔl ci meelik nɔɔnɔ, ma ademez niini nɔɔgɔ ɲinaante. ¹⁴ Mazi odotiz niini demziinta, iicak bodo kidicilim, ma gola icin niini Livai ween ɲɛerti Alvayoz aavi ɲaao meeryo, eeci gɔɔn laadun niini eet ci alot meeri. Ma anek Yesu nɔɔnɔ ne, “ɲja, nowawan aneet.” Ma iɲaaz Livai, ma ano nɔɔnɔ. ¹⁵ ɲintimiliny ɔtɔɔɔ Yesu kibeen nuyak ogin ɔtɔɔ ole o Livai ka kɔtɔ kadayit dayiin o baalinu ɲinaante. Ma avu buk ɔl ci meelik ole o gɔɔn alot meeri kibeen ɔl o oɲenu oogi, ma ano Yesu kibeen nuyak ogin, ma avɔ azɔlɔ kibeen nɔɔgɔ ɲinaante. ¹⁶ Mazi avɔ acin alaata o Parici demziinto Yesu azɔlɔ kibeen ɔl o meeryo been ɔl o oɲenu oogi, ijinit niigi nuyak ogin enektek ne, “Azɔlɔ Yesu ki ɔl nicoko naa?”

¹⁷ Mazi azii Yesu zɔɔz nico, enek nɔɔgɔ ne, “Gɔɔn ɔl calaɲ amɔɔr alaɲ arɔɔɲ niigi akim. Maje ɔl o amɔɔr arɔɔɲ niigi akim. Alaɲ zin laadun kakun naana ka kiiya kotowa ɔl o agɔɔn kaal o abon, bar kakun ka kiiya kotowa ɔl o oɲenu.”

Demziin o Yesu

¹⁸ Ma iitene oman otoɲit nuyawa o ɲɔn kibeen ɔl o Parici dayiin ka kidiɲɲanɛt Jook. Ivita ni ɔl ogen, ma avu ajin Yesu anek ne, “Ma dim gɔɔn nuyawa o ɲɔn kibeen ɔl o Parici oɲ dayiin, maje bar nuyawa cugune o alaɲ oɲ buk niigi dayiin o naa?”

¹⁹ Ma abedeke Yesu nɔɔgɔ anek ne, “Inoko gɔɔn ma iɲkayi ɔl, anyek niigi bacok kaavtiyɔ magizet? Bar kanɛ, Akɔm! ɲinti ɲaan rak aromen niigi kibeen eet ci rociinto o dook, alaɲ rak niigi aavtiz magizet. ²⁰ Bar zin ɲaan aku iiteni ci ka kaaryai ɛeti ci rociinto o ɲaatineeɲ. Mazi aku iiteni nica, ɲaan zin aavtiz niigi magizet.”

²¹ Ma bodo anek Yesu nɔɔgɔ ne, “Akɔm eet ci abutanek rum ci reen gɔn ci colai. M̄ koca agɔɔn niini nɔkɔ, arɛɛcai koca rum ci reen o gone ci colai o kizi vɔlɔɲ ɔrɔɔt bar kujuk reecinɛt baal oowu e.”

²² Ma anek Yesu bodo nɔɔgɔ ne, “Akɔm buk eet ci arek iira buru ci reen. M̄ koca agɔɔn niini nɔkɔ, ade koca iirana, ma alip buru. Ma aɲuuti iirana, ma alibe burwe buk. Bar abon arek ɛeti iira buru ci colai.”

(Aduwak Yesu nɔɔgɔ zoozok nicoko o ka keyelizak niini nɔɔgɔ zɔɔz calaɲ abon ɲaati aromi niigi zoozok o Joowo colai kibeen keerane ugeec reen.)

Ademez Yesu ɔl zɔɔz ci akati iitene o yubzento

²³ Ma iitene o kazi Sabit yubzento awɔ Yesu kibeen nuyak ogin, ma avɔ abatak manɛen ci labinu. Ma aduula nuyawa ogine labi ci miliny, ma arom. ²⁴ Ma anek ɔl ci Parici Yesu ne, “Cin di nuyak cugun o! Abacit niigi lotinet o azi ne, M̄ aliɲɲiɲnyu iitene o yubzento.”

²⁵ Ma abedeke Yesu nɔɔgɔ anek ne, “ɲaan ekeebit niiga zɔɔz baal agɔɔn Devid iitene baal adayi nɔɔgɔ magiz e? ²⁶ Waanice adak magiz nɔɔnɔ kibeen ɔl ogin ɔrɔkɔr. ɔtɔɔ ni ceenze o Joowo, ma avɔ adak dɔken baal gɔɔn ataabi ɔl Jook e. Ma gi nici agooni waanbaal ɛene ɛeti o kazi Abazar alaan ci adikir ceenze o Joowo. Ma keerite ogaac alaɲ dɔken ci taabinto noko ɔl ci gaga adak, bar adak alaata o ceez o Joowo doon. Adak zin waanice Devid dɔken niceke labak, ma buk anyek niini oogi ɔl ogin ɔrɔkɔr.”

²⁷ Ma anek Yesu ɔl o Parici ne, “Agɔɔna zin laadun Jooi iiten ci yubzento o ka kitirit ɔl ci deer. Alaɲ bar agɔɔna Jooi ɔl ci deer ka kuzuuti iiten ci yubzento o. ²⁸ Zin naana ɲɛerti Eeto keen Manyi ci kaal dook kurum buk iiten ci yubzento o.”

Atirit Yesu eet ci dɔkɔm aziiti

3 ¹ Ma iitene oman mazi akɔ Yesu ceenze o lotento, anyak buk eet ci dɔkɔm aziiti ɲinaante. ² Maje ɔl ci Parici ogen aavtiz ɲinaante arɔɔɲ niigi gɔl ci ka kɔkɔtake Yesu rooni m̄ anyak niini gi ci abac. Ivita ni ataɲaamtek niigi nɔɔnɔ ɔrɔɔt ɛle ka kicinɛt m̄ didi atirit niini eet nico iitene ci yubzento o. ³ Enek ni Yesu eet ci dɔkɔm aziiti noko ne, “ɲja. Bil ɔl ɲuma ɲaato.”

⁴ Ma ajin Yesu ol anek ne, “Mayo goon lotinowa ogaac aziineket kutuguz gitaz iitene ci yubzento o? Kitiritit ol yo kegerezanit da? Korogozit ol yo kuulalit da?” Mazi azii niigi zɔɔz nico, olla azi paŋ, kɔkɔm gi ci abariz.

⁵ Ma agelem Yesu nɔɔɔɔɔ bornet nɔɔɔɔ. Bar bodo iinon ziniza nɔɔɔɔ, eeci adɔi nɔɔɔɔ zinzeeti kak. Ma anek niini eet ci dɔkɔm aziiti noko ne, “Zolan aziit cun o.” Mazi zɔlan eeti nici aziit, obona aziiti onine labak. ⁶ Enico ele udunito ol o Parici ceeze o lotento, ma avɔ abaaban niigi kibeen ol o alaan o kazi Erod gɔl ci arui Yesu kadaak.

Ano kɔle ci appe Yesu

⁷⁻⁸ Ma avɔ Yesu kibeen nuyak ogin liile o kazi Galili. Ma ano kɔle ci appe nɔɔɔɔ. Maje ol nicigi avu looce o kazi Galili ki Judiya ki Jerusalem ki Idumiya ki Tayor ki Sidon kibeen baagite o liil o kazi Jordan. Avunak niigi dook Yesu o, eeci azii niigi kaal o agɔɔɔ niini. ⁹ Mazi acin Yesu kɔle appe ɔɔɔɔ, ma eet nɔɔɔɔ nɔkɔ, uduwak niini nuyak ogin kanyaakta nɔɔɔɔ kavool o liilu kizi ajɔn, ka mɔ ayɔɔɔ ol nɔɔɔɔ ɔɔɔɔ, ka keelai ele. ¹⁰ Agɔɔɔ nɔkɔ o, eeci uyene atirit niini ol ci meelik amɔɔɔ, ma giye nico ivita ol o amɔɔɔ dook, ma ayɔɔɔɔ ɔɔɔɔ ele, eeci arɔɔɔ kuumit niigi nɔɔɔɔ. ¹¹ Mazi olla acin ol o anyak mininj ci Loryento nɔɔɔɔ, iina niigi nɔɔɔɔ keŋa, ma agereny azi ne, “Een niina ŋeerti Joowo neen.” ¹² Ma aricanek Yesu nɔɔɔɔ anek ne, “Má ayelezanaŋ aneeta ŋaati awuyaŋ kizi ŋeerti Joowo.”

Aŋera Yesu toonnyak amɔɔɔ ram

¹³ Ma vurta ootoozek Yesu biyen, ma ŋinaante otowa ol ci arɔɔɔ niini. Ma avunak niigi nɔɔɔɔ. ¹⁴ Ma aŋera ŋaatineej ol ceen amɔɔɔ ram kizi toonnyak cigin ka gɔɔn korkorit ki nɔɔɔɔ, ka buk gɔɔn kitoon kɔɔt kuuwayit zɔɔz o Joowo. ¹⁵ Ma anyek niigi nɔɔɔɔ dɔyiz ci ka kɔɔɔkti mininj o Loryento ɔla.

¹⁶ Zaar zin ci toonnyak ceen amɔɔɔ ram baal aŋera niini o neen ce. Saiman o kazi zaar oogi ne Pitɔr, ¹⁷ ki Jemis ki gɔtɔni o kazi Jɔn o eegin lɔgɔz o Zebedi (Akanek Yesu nɔɔɔɔ dook ramantiya zaar ci kazi ne Ol o Aŋozonek Zɔɔz), ¹⁸ ki Andoru, ki Pilip, ki Bartalamu, ki Matiyu, ki Tomaz, ki Jemis ween ŋeerti Alvayoz, ki Tadiyaz, ki Saiman o gɔɔn ɔɔɔɔne looc onin ole o Rom, ¹⁹ been Judaz Iskariyot baal ka kiiya kataalɔi Yesu e.

Ademez Yesu kaal ci akati Loryen

²⁰ Ma vurte nice ook Yesu ɔlɔ. Ma bodo alotak ol ci meelik nɔɔɔɔ ki nuyak ogin zee makacin ɔkɔma nɔɔɔɔ waŋi ci adayin. ²¹ Mazi azii atenowa ogine kaal nicoko, ɔɔɔ niigi ŋaatin ka kɔɔt kanyaaktak nɔɔɔɔ kɔɔk, eeci ano ol ogen ne, “Anyawun niini maŋɔn.”

²² Mazi buk avu alaata o gɔɔn ademzek ol lotinok Jerusalem, izito ne, “Anyak niini alya Loryen. Anyewun nɔɔɔɔ alaani o mininj kazi Baalzibol dɔyiz ci ka kɔɔɔyi niini mininj o Loryento ɔla.”

²³ Otowa ni Yesu ol, ma aduwak nɔɔɔɔ yabziinta gi ci anek ne, “Alaŋ Loryenti atɔk gɔn oma ci buk een Loryen kiyo niini o. ²⁴ Gɔɔn mɔ aŋerɔ ol ci looc codoi, ma ɔɔɔ niigi maany, alibe lɔɔci nici lai. ²⁵ Buk mɔ aŋerɔ ol ci kɔɔk codoi, ma ayɔɔɔ niigi maany, kɔɔgi nici alibe. ²⁶ Zin buk mɔ aŋer Loryenti mininj ogin, ma ayɔɔɔ niigi maany, adicai koca dɔyizi cine o.

²⁷ Akɔm laadun eet ci akɔ agɔɔze ceeze ci eet ci mooti adɔi, dooke coma koca rak adɔɔn niini nɔɔɔɔ zee ka zin vurta kiiya kooyi niini kaal ci eet ci mooti adɔi noko.

²⁸ Didile kaduwakuŋ igeet, anim Jooi kotoŋ oŋe o abaca ol ŋaatin dook kibeen buk zoozok ugeec ger gɔɔn amomozene. ²⁹ Maje eete ci amomoz Vɔŋjiz o Joowo, alaŋ Jooi ooŋ oŋec nico ŋaatin been neen, eeci abaca niini oŋec ci ger ɔɔɔɔ ele, ma ibil nɔkɔ izi neen.” ³⁰ Aduwa Yesu zɔɔz nico o, eeci azi ol ogene ne, “Anyak niini mininj ci Loryento alya.”

Gɔtɔnɔgi Yesu kibeen yaatin

³¹ Zin ivita gɔtɔnɔgi Yesu kibeen yaatin, ma avu eel bitaala, ma itoon niigi eet oma kutuwak nɔɔɔɔ Yesu. ³² Maje kɔle ci appe aavtiz loota aliya Yesu, ma aku anek eeti nici Yesu ne, “Yaatin kibeen gotonogu ci areyin bitaala neke. Aroŋnyin niigi ineet.”

³³ Ma abedeke Yesu nɔɔɔɔ anek ne, “Yaai ŋene? Ol cigaj ci een gɔtɔnɔga o?” ³⁴ Ma acin niini ol ci aavtiz loota alya nɔɔɔɔ o, ma azi ne, “Nici gi gɔtɔnɔga kibeen yaatigan. ³⁵ Ma ol o gɔɔn agɔɔn kaal o arɔɔɔ Jooi, eegin niigi yaatigan ki dɔl ci yaai.”

Yabziin ci eet ci dɔwento

4 ¹ Ma iitene oman ademze Yesu liil o Galili otoga. Ma avu ol ci meelik ger alotak nɔɔɔɔ. Makacin ook niini kavoola liila tɔ, ma ako aavi loota ŋinaante. Maje ol dook aavtiz dɔwɔna. ² Ma ademz niini nɔɔɔɔ ŋaati ayabzi zoozok yabziinowe ci meelik. Ma anek nɔɔɔɔ ne,

³ “Iziikto di! Anyak baale eet ci akɔ dɔwen. ⁴ Mazi akɔ adowe, iitazak dɔwo ogene ŋinten gɔl, ma avu kibaali, ma avera dɔwen nicoko dook lai. ⁵ Maje dɔwo ogene iinak tɔɔ ŋinten biyen, ma aduŋna kataman nɔkɔ, eeci akɔm tɔɔ ci meel. ⁶ Mazi aarane kɔr, araabajai lai, eeci akɔm tɔɔ ci ka kurukteke agerɔ looc juruŋ. ⁷ Bodo dɔwo ogene iinak bila, bar mazi aduŋna, eedit bila nɔɔɔɔ, makacin alajaan anyak kebere. ⁸ Maje dɔwo ogene iinak tɔɔ ci abon, ma aduŋna juruŋ, ma adikir, ma abiirna kebere. Ceegi anyaa kebere ci miliny. Ceegi anyaa kebere ci meelik kidicilim. Maje ogen anyaa kebere ci meelik ɔɔɔɔ.”

⁹ Zin enek Yesu nɔɔɔɔ ne, “Mɔ anyaku iin, abon aziŋnu zoozok nicoko juruŋ.”

¹⁰ Mazi azaani ol, aavu Yesu niini doon. Ma avunak nuyawa ogine kibeen buk ol oogi nɔɔɔɔ, ma avu ajin niigi nɔɔɔɔ keŋti ci zoozok nicoko.

¹¹ Ma anek niini nɔɔɔɔ ne, “Anyozzeyuŋ igeet genyizi ci ka agayi baliin o Joowo. Maje ol ogen azii gɔɔn niigi zoozok yabziinta. ¹² Bar alaŋ aga niigi zoozok nicoko keŋti cigeec juruŋ. Waan te kagaac, atu waan niigi Jook, ma aara Jooi oŋeeti ugeec.”

Aduwa Yesu keŋ ci yabziin nico

¹³ Ma anek Yesu nɔɔɔɔ ne, “Alaŋ agayu keŋ ci yabziin nico? Mɔ alaŋ agayu keŋ ci yabziin nico, ka zin tiŋeere agaac yabziinok o ŋaan kuduwayuŋ dook ku? ¹⁴ Keŋ zin ci yabziin nico neen ce. Ma dɔwo ci adok eeti o zɔɔz o Joowo neen. ¹⁵ Ma ol ogene atobo niigi ki gɔl keŋ o iinak dɔwo e. Eeci ma azii niigi zɔɔz o Joowo, taman nɔkɔ aku Loryen, ma aara zɔɔz o Joowo zinzeetine ugeec. ¹⁶ Ma ol ogene atobo ki tɔɔ ween biyen e. Eeci ma azii niigi zɔɔz o Joowo, agama niigi labak talniinta. ¹⁷ Bar alaŋ akɔ zɔɔz nici zinzeetine ugeec eecito juruŋ, ma alaŋ atuwe ŋinti wun. Mazi avunak piryakzet nɔɔɔɔ tuwente uneej, ooŋ niigi tuwen enico ele.

¹⁸ Ma ol ogene atobo ki tado o anyak bila e, eeci nicigi azii zozo o Joowo, ¹⁹ Maje bar qaato iinon bodo niigi kaal o loocu, ma aronj niigi kaal o arokzetu dook, ma kaal nicigi dook avo zinzetene ugeec, ma adaal zozo o Joowo zee makacin okoma noogo tuwen.

²⁰ Ma ol ogene atobo ki tado o abon e, eeci azii niigi zozo o Joowo, ma atuwe juruj. Ma anyek tuwen cineej noko noogo kiziti ol ci abon kiyo labina o anyaa kebere o miliny, ki kebere o meelik kidicilim, kibeen kebere o meelik oroot e.”

Yabziin ci Lambo

²¹ Ma anek Yesu ol bodo yabziinte oman ne, “Goon ma avaat eeti lamba, alaj abuj ija, karabonj buk alaj arek kerca loota. Bar arek niini lamba tarabeza taden. ²² Zin gi o aroodi inoko, katin aboryai. Buk gi o abuje inoko, katin ayelzai. ²³ Zin ma anyaku iin, iziiyit zoosok nicoko juruj.”

²⁴ Ma anek Yesu noogo ne, “Aryek zinzeti zoosok ci ona aziiknu noko juruj. Acaca tijeere Jooi kaal o goon agooneku niiga ol oogi gole ci atobo kibeen kaal o agooneku niiga noogo. Ma bar acaca niini qaatoononj oroot ele kujuk niceke. ²⁵ Eeci eeti ci anyak gi ci anyak anyonek bodo noono ci appe. Maje eeti ci akom gi ci anyak, mayo nuun anyak niini ci miliny, aamnyai koca bar nici qaatin.”

Yabziin ci dowoc ci aduyna

²⁶ Ma bodo anek Yesu noogo yabziinte oman ne, “Ma baliin o Joowo atobo kibeen eet ci adowe mane cin. ²⁷ Mazi adica downen, ook niini aavu ol labak. Ma aduyna labina niigi doon, ma iqaaz, bar alaj niini aga iqaaz labina ku. ²⁸ Ma tadowa alya anyek labi kudunta, ma abiir. Rak zowa anyek noogo kanyayit kanaya. Ma bodo anyek kobolbolanit, ma vurtu aduyna ooti, ma abiir kanyayit kebere. ²⁹ Mazi avo adoi, ateeda niini noogo ecodoi noko, eeci izi iten ci teedinto.”

Yabziin ci keberec ci motojtoco

³⁰ Ma anek Yesu noogo ne, “Kayo kayabiztek baliin o Joowo gitaz? Atobo yo niini kibeen naa? ³¹ Atobo zin baliin o Joowo kibeen keberec o motojtoco miliny ter goon aduyna mana o. ³² Mazi ako aduyna, iqaaz ma adikir oroot kujuk keen dook, ma akanek oto ci appintik, ma eenyci kibaali ceezi.”

³³ Ma aduwak Yesu ol zoosok yabziinowe ogen bodo. Aduwak niini noogo zoosok waakcaye ci meel ka kiziiyit juruj. ³⁴ Aduwak niini noogo zoosok dook yabziinta, bar mazi arome niini kibeen nuyak ogin doon, oobek noogo zoosok kehti labak.

Alam Yesu hort

³⁵ Ma itene nice ele yomana enek Yesu nuyak ogin ne, “Abon di kavo liil baagita.” ³⁶ Ma adotek nuyawa kole looc, ma atoot kavool. Maje uyene Yesu araye ook kavoola laadun. Otoso ni niigi dook kibeen noono. Buk anyak kavool oogi ci orkor ki noogo. ³⁷ Jintimiliny noko iya hort ci appe oroot ele, ma ayelyelanek maam kavool zee ma aronj abiz kavooli. ³⁸ Maje Yesu onj kavool vurtu aruk w ruma. Ma iijka niigi noono anek ne, “Gayoi, alaj abaaban zozo ci ka kadaakti naaga o?”

³⁹ Ma iqaaz Yesu, ma agerneyek hort anek ne, “Bil.” Bodo anek liil ne, “Tivane.” Makacin didi ibil hort, ma azi maama jan.

⁴⁰ Ma anek Yesu nuyak ne, “Anjolinu naa? Jaaan dim akomnuj igeet tuwen noko?”

⁴¹ Bar enico anyayit niigi joliiin ci appe oroot. Ma ano ne, “Mayo eeti nici abil ku? Ako zee ma een nuun hort kibeen liil azii buk zozo cin!”

Atirit Yesu eet ci anyak minij o Loryento

5 ¹ Abaayizit ni Yesu kibeen nuyak ogin liil o kazi Galili, ma avo baagite o looc o ol o kazi Garazin. ² Mazi aduyna Yesu kavoola, taman noko iyyak noono eeti ci anyak minijit ci Loryento. ³ Anyak eeti nici minijit nico alya, ma ako goon abaak niini bootwane o ol o adaa. Ma akom ol ci ka koolit noono cabiinta been neen. ⁴ Acap goon ol noono azeen kibeen zoz ziiyi lak ci meel ger, bar enicoko dook aqaak niini ziik nicoko. ⁵ Tup noko agereny niini waazinok ki baalinok bootwani ki biyene. Ma atatac ele biyene.

⁶ Mazi acina niini Yesu reena, adokonyonek noono, ma ako akani kozohti looc noono keja. ⁷⁻⁸ Ma anek Yesu minijit ci Loryento o ne, “Duna eete nico.”

Ma agereny minijit molowe ci appe azi ne, “Yesu herti Jook o adikir, aroonj qaatan gitaz? Kalayin ineet zaare o Joowo ka calan uulalan.”

⁹ Ma ajin Yesu minijit nico anek ne, “Kazi zaar cugun ne?”

Abedeke niini noono anek ne, “Kazi zaar cigan ne Kole, eeci keegina naaga meele.” ¹⁰ Ma ilalek miniya Yesu oroot ka calan atooyek niini noogo looc oma.

¹¹ Maje jinaante anyak kacacabanen ci meelik ger age biya. ¹² Ma ilalek miniya ci Loryento noko Yesu anek ne, “Nyet koota kacacabanene niceke ka koot kabaakta eleetine qaatineej.” ¹³ Anyek ni didi Yesu noogo kudunta eete nico kooto kacacabanene, ma avo didi niigi qaatineej. Ma avira kacacabanena voroora, ma iinak liil kutudude dook lai. Maje kacacabanena nicigi dook een eet tur lak eetom (2000).

¹⁴ Odokonyit ni ol ona oowa kacacabanen e, ma avo aduwak ol o eevyi maneeni kibeen ol dook kutura zozo nico. Ma avu ol dook ka kivita kicinit gi ci akanai o. ¹⁵ Mazi avunak ol Yesu, bar amada niigi eet baal goon anyak minij o Loryento meelik e aavi loota jinaante. Anyawun niini rum alya, ma buk obona noono w onine labak. Anyayit ni niigi dook joliiin oroot ele. ¹⁶ Maje ol ona icinit gi o agoononek eet nico kibeen kacacabanen zowa e, uduktak buk niigi gonogi gi nico. ¹⁷ Ilalek ni niigi Yesu kotoo looce cineej o.

¹⁸ Mazi atoot Yesu kavool, ilalek eeti ci ona anyak minij ci Loryento noko Yesu ka korkorit kibeen noono. ¹⁹ Bar ujura Yesu qaati orkori ki noono, ma anek ne, “Bito ol atenowe ugun ka bito duwak noogo gi ci abon atiritin Manyi ineet noko.”

²⁰ Otso ni eeti nici, ma ako azop kuturyok ween amoto aduwak ol gi ona agoonek Yesu noono e. Ma abiir ol dook ooti zooze nico.

Dole ci Jairas kibeen qaa ci amoor uum Yesu rum

²¹ Mazi amiironek Yesu baagit, ivitak kole ci appe noono liiltoga. ²² Ma jinaante iya alaani ci ceez o lotento. Kazi alaan nico zaar ne Jairas. Mazi acin niini Yesu, iya aavek noono loota kopokpok. ²³ Ma ilalek noono oroot ele anek ne, “Beenyan o miliny amoor oroot, ma aronj kadaak. Ija da taadek noono aziit ka korok.” ²⁴ Orkorit ni Yesu ki noono.

Maje kóle ci appe ɔɔt ano buk nɔɔnɔ, ma iiciwɔ ɔl nɔɔnɔ kabanyɔi zɛɛ makacin oyootit nɔɔnɔ. ²⁵ Maje ɲinaante anyak ɲaa ci amɔɔr maam o ɲaanu irkitok amɔɔt ram. ²⁶ Amɔɔr niini ɔɔt, ma azɔp akimane ci meel ger irkitok dook, ma ɲaan kizi maya nɔkɔ, bar azaaci mɔɔrizi ɔɔt. ²⁷ Mazi azii niini zɔzɔ o arogzi Yesu ɔl o amɔɔr, iiya buk niini, ma ako kɔla eecitɔ, ma icaya zɛɛ ma apadan Yesu eci bawuco, ma uum nɔɔnɔ rum. ²⁸ Agɔɔn nɔkɔ o, eeci abaaban niini azi ne, “Mā nuun inoko kuum rum cin o ɛle doon, keen koca maya.”

²⁹ Mazi didi uum niini Yesu rum, eelit maama enico ɛle, alaɲaan aduɲna. Makacin agawun niini ele onin izi didi maya. ³⁰ Maje Yesu aga nɔkɔ uduna ɲaatin dɔyizi ci miliny, ma ookconek kóle enico ɛle, ma azi ne, “ɲɛnɛn ci uum rum can o?”

³¹ Ma anek nuyawa nɔɔnɔ ne, “Aga niina iiciwonun ineet ɔl ci meelik ger noko. Ajinei zin ku azi ne, ɲɛnɛn ci uum rum can o?”

³² Maje Yesu agelem nɔɔgɔ dook arɔɲɲ kicin ɲɛnɛn ci uum nɔɔnɔ o. ³³ Maje ɲaa nicini aga gi o agooni alye onin. Iiya ni niini ɲoliinta kabarit kedekedek, ma aku aavek Yesu loota kɔpɔkɔk, ma aduwak nɔɔnɔ gi ci ona agɔɔn niini o. ³⁴ Enek ni Yesu nɔɔnɔ ne, “Beenyan, anyin tuwen unun ineet izi maya inoko. Zin tɔ talniinta. Alaɲ mɔɔrizi nici abadakin bodo.”

³⁵ Mazi ɲaan azɔzɔ Yesu kibeem ɲaa nico nɔkɔ, ivita ɔl ogene ole o Jairas, ma avu anek nɔɔnɔ ne, “Adaak dole unune. Má ɲaan amila gayoi gaga.”

³⁶ Mazi azii Yesu zɔzɔ ci aduwa ɔl nicigi o, enek niini Jairas ne, “Má anyei ɲoliin gaga. Tuwɔ labak.” ³⁷ Mazi ka kook niini ole o Jairas, alamun ɔl o ano nɔɔnɔ e dook, ma ɔrkɔr niini ki Pitor ki Jemis kibeem Jɔn ween gɔtɔni Jemis doon. ³⁸ Mazi avɔ ajɔɲɔz niigi kɔrɔk o Jairas, azii niini ɔl luwa. Iboobi niigi ɔɔt ɛle. ³⁹ Ma ako niini kɔrga eecitɔ, ma anek nɔɔgɔ ne, “Naa? Aluyu naa? Dole alaɲ adaai, bar olla ɔɲ niini labak.” ⁴⁰ Bar apez ɔl zɔzɔ cin o. Otooyek ni niini nɔɔgɔ dook bitaalin. Ma akɔyi baati doleco been yaatin kibeem nuyak ogin een iiyu, ma avɔ ceeze ci ɔɲɛ dole o. ⁴¹ Ma agam niini dole aziit, ma anek otoge uneɲɲ ne, “Talita koom.” Ma keɲ ci zɔzɔ nico kazi ne, Beenyan, tiɲa jena.

⁴² Enico ɛle itiɲa didi dole jena, ma awɔ. Maje irkitowa ci doleco tiryanto een amɔɔt ram. Ma abiir ɔl ona ɔrkɔr ki nɔɔnɔ e dook ooti ɔɔt. ⁴³ Ma aricanek niini nɔɔgɔ ɔɔt ka calaɲ aduwak ɔl oogi gi nico. Ma anek niini nɔɔgɔ ne, “Anycek dole gi ci adak.”

Abor ɔl Yesu Nazarakti

6 ¹ Ma vurta ɔtɔ Yesu imiurozek kutur onin kazi Nazaret. ɔrkɔr kibeem nuyak ogin. ² Ma iitene o yubzento kazi Sabit ook ɛdemɛz niini ɔl ceeze o lotento. Mazi azii ɔl ci meel demziin cin o, ibiirit nɔɔgɔ ooti tet. Ma ajinɔ ano ne, “Ma ɛeti nicini ajowa kaal nicoko ɲaa? Genyiz taz ci anyonek nɔɔnɔ o? Ma liɲliɲɔn ci atɛt ɔl biye noko ajowa niini ku? ³ Alaɲ een eet o gɔɔn abaac keen o neen? Alaɲ een niini ɲɛerti Meri? Alaɲ een niini gɔtɔni Jemis ki Josev ki Judaz been Saiman? Alaɲ een ɲɔɔnɔgi neen o gɔɔn karome ɲina o?” Zin giye o agawi niigi nɔɔnɔ, otoborit niigi demziin cin.

⁴ Ma anek Yesu nɔɔgɔ ne, “Gɔɔn laadun nyakaɲan atitiny ɔl nɔɔnɔ loocowe dook, maje bar ɔl o kutur onin been atenok ogin ɛle alaɲ atitiny nɔɔnɔ been neen.”

⁵ Zin giye nico alaɲaan Yesu anim kutugu kaal ci atɛt ɔl biye ɲinaante, bar olla ataadek niini azɛen ɔl ci miliny amɔɔr, ma arogz nɔɔgɔ. ⁶ Ma abiir Yesu ɔɔ ɔɔt, giye ci ɔl o kutur onin ɛle alaɲ atuwi zɔzɔ onin o.

Itoonek Yesu nuyak ogin loocok

Ma azɔp Yesu korogjok ademɛz ɔl vitenane niceke. ⁷ Ma awa niini nuyak ween amɔɔt ram, ma itoon nɔɔgɔ korkorit gɔɔn raman, raman. Ma anyek nɔɔgɔ dɔyiz ci atɔɔi mininj o Loryento ɔla. ⁸ Ma aricanek niini nɔɔgɔ gi ci anek ne, “Má avoyu dayiin ki guruc been kaboot ci anyaku kaal. Bar olla anyayit keen ci omtinto doon. ⁹ Ooti caava kibeem rumanɛ ci anyaku eleetine o doon kɔkɔm bodo oogi. ¹⁰ Mā atalnanuɲ ɔl ɲaaman, aavtiz ole nico zɛɛ ma awoyu looce nico. ¹¹ Mā anyak ɲinti alaɲ atalnanuɲ ɔl igeet, ma alaɲ azii niigi zɔzɔ cunooɲ o, otɔɲit ɲinito. Utuduɲta tɔdɔ zɔɔne ka keyeliza gi nici gi o aborni niigi zɔzɔ onan.”

¹² Mazi ako aɔroneke Yesu zɔzɔ, ɔtɔzɔ ki nuyak, ma avɔ uuwayek ɔl gi ci anek ne, “Eteedɔi oɲɛ ugooc.” ¹³ Ma atɔk niigi mininj o Loryento ole ci meelik, ma avuut ɔl ci meelik amɔɔr ooti maala, ma arogz nɔɔgɔ.

Daayiz o Jɔn o oonyi

¹⁴ Ma adala awaɲi ci kaal o agɔɔn Yesu ɔl dook, makacin iziik buk alaani o kazi Erod kaal nicoko dook, eeci azi ɔl ogene ne, “Bar bɔɲ nicini Jɔn o oonyi neen urugun bodo daayiza. Gi ci inoko agoonine kaala ci atɛt ɔl biye noko neen.” ¹⁵ Ma bodo azi ɔl ogene ne, “Bar bɔɲ Ilija gi.” Maje ɔl ogene azi ne, “Coma een nyakaɲan ci Joowo atobo kibeem nyakaɲanɛt o reen.”

¹⁶ Mazi azii Erod gi nico, izi ne, “Inoko ɛeti nici Jɔn baal oonyi ɔl baal kanyi takiren keteeda ɔɔ e neen. Urugun inoko bodo niini daayiza.” ¹⁷ Azi Erod nɔkɔ o, eeci baale anyek niini takirnya kagamit Jɔn, ma arek sijin. Agɔɔn niini gi nico o, eeci waanice aama niini Pilip ween gɔtɔni ɲaa onin kazi Erodias. ¹⁸ Iiya ni Jɔn o oonyi, ma anek Erod ne, “Gerze gi ci aamane gotonu ɲaa cin noko.” ¹⁹ Otoborek ni Erodias Jɔn nɔɲ, ma arɔɲɲ kuruk nɔɔnɔ kadaak, bar akɔm gɔl ci aruyi, eeci Erod alaɲ agama gi nico. ²⁰ Aɲole niini Jɔn giye o ɛene Jɔn eet ci Joowo abon. Ebewun ni Erod nɔɔnɔ, ma arɛz ɲaati aziikni kaal ci uuwak Jɔn, mayo nuun gɔɔn iima amadik niini nɔɔnɔ o.

²¹ Ma vurta ojowa Erodias gɔl ci ka kurui Jɔn, eeci iitene oman awa Erod alaati o akumawo, ki alaati o takirnyawu, been ɔl o Galili een arɔk ka kivita kadayit kɔnyit ci aadane niini iiten onin baal aritan e. ²² Iiya ni tinati Erodias, ma aku arogom ɔl kɔrgena zɛɛ makacin ataltɔ Erod kibeem kernok ogin ɔɔt ɛle. Ma anek niini dole ne, “Mā anyak gi ci arooɲ, duwayan ka kanyin.” ²³ Ma aterkedek niini nɔɔnɔ bodo gi ci anek ne, “Olla gi ci ajinan aneet, kanyin. Yo nuun arooɲ keɲɛreyin alaazet can o kɔrgena, kanyin labak.”

²⁴ Udun ni dole ook bitaala, ma ako ajin yaatin anek ne, “Kijin baaba naa?”

Ma abedeke Erodias nɔɔnɔ anek ne, “Jin baatun keteedayin ɔɔ o Jɔn o oonyi.”

²⁵ Abada ni dole enico ɛle, ma aku anek Erod ne, “Karooɲ ɔɔ o Jɔn o oonyi. Nyaayan kodooca ɲina inoko ɛle.”

²⁶ Mazi azii Erod zɔzɔ nico, iion zɔzɔ nico, ma avir ziniz ɔɔt, bar akɔm gi ci ka keela, eeci uyen eterkedek niini dole zɔzɔ ci adɔi kak kernok kɔrgena. ²⁷ Kataman nɔkɔ itoon niini takiren ka kook keteeda Jɔn ɔɔ ka kanyaa. Ook ni takirenti sijina, ma ako atɛda Jɔn ɔɔ didi. ²⁸ Ma anyaa ɔɔ kodooca, ma aku anyek dole. Ook ni dole anyek yaatin. ²⁹ Mazi azii nuyawa o Jɔn gi nico, ivita ooti niigi nɔɔnɔ ɔt adaaca.

Adayiz Yesu ol ci meel

³⁰ Mazi abada nuyawa keronnya, ivita uduktak niigi Yesu kaal o avo agoon niigi dook kibeem kaal o ademez. ³¹ Maje iitene nice anyak ol ci meelik avunak Yesu zee ma alaj ajowa niini been nuyak ogin waji ci ka kadaktai. Enewun ni Yesu nuyak ogin ne, “Kotooz kooto jaati akom ol ka ototo uyubuzit njintimiliny njinaante.” ³² Ototo ni niigi kavoola ka kooto jaati akom ol.

³³ Mazi awo, icinit ol ci meelik noogo. Ma giye o agayi niigi Yesu kibeem nuyak ogin, ivirtozek niigi kuturyowe dook njinti avoyi niigi o, ma avir niigi baagitok dook zee ma avo arak njinite ijaan niigi kurumit. ³⁴ Mazi adujna Yesu kavoola, acin niini kole ci appe otoot, ma awuci noono ziniz jaatineej otoot, eeci acin noogo eel kiyo eezana o akom tuwayoi o. Ma ademzek niini noogo kaal ci meel ger.

³⁵ Ma yomana ivitak nuyawa ogine noono, ma avu anak ne, “Izi looci baalin, ma buk een njiniti balal. ³⁶ Anyek ol kazaante koot korogjowe ci kajonzo noko ka koot kataala kaal ci adak.”

³⁷ Ma bar abedeke Yesu noogo anak ne, “Anycek noogo dayiin niiga alya.”

Ma anak niigi Yesu ne, “Alaj kanyaka guruc ci aleeno ki dayiin cigeecc dook.”

³⁸ Ma anak Yesu noogo ne, “Anyaku inoko dayiin ceen ku? Ototo di icinit.”

Mazi avo acin, ivita enektec niigi noono ne, “Kanyaka dokken ceen tur kibeem kuluk ram noko.”

³⁹ Ma anak Yesu nuyak ne, “Ototo ejerit ol kiziti kotore. Anycek noogo kaavtiyo loota artene ci colai noko.” ⁴⁰ Mazi aavtiz niigi loota, een goon kotoritin ceeni eet ram kamoto (50), maje ceegi een eet tur (100). ⁴¹ Odoma ni Yesu dokken ceen tur o kibeem kuluk ceen ram o, ma acin tammu taden, ma anyek Jook zany. Eteet ni dokken, ma anyek nuyak ka kejerterek ol. Ma buk ajerek kuluk nuyak ka kejerterek ol. ⁴² Ma adake kole oke dook zee ma apiiyani. ⁴³ Ma abitiz nuyawa gilanya ceen amonki ram toc dayiine ci anyigzai kuluge kibeem dokkeni. ⁴⁴ Ma ol ci adak dayiin noko o een ol ci mac doon eet tur lak eet ram kamoto (5000).

Awo Yesu maam tadena

⁴⁵ Kataman noko anak Yesu nuyak ogin ne, “Ototo kavoola arakte ototo kuture o kazi Bezediya liil baagita.” Aavu ni Yesu niini doon ka rak kazaan kole. ⁴⁶ Mazi azaani kole, ototo ni niini ook biya ka kook kanarowo. ⁴⁷ Mazi ako arara looci yomana, urum kavoolle liil keji. Maje Yesu jaan aavi dowona niini doon. ⁴⁸ Ma acin niini noogo apirna ototo ele wolinta, eeci atirginyo njoot. Mazi agor tammu, iyyak Yesu noogo jaati awoyane maam tadena. Aronji niini ka kiiya kidicek. ⁴⁹ Mazi acin niigi noono awo maam tadena noko, abaabanit izito ne, “Coma bar een minijit.” ⁵⁰ Ma acin niigi dook noono njoliinta, ma agereny ototo ele. Kataman noko ozoozek Yesu noogo anak ne, “Agamit zinzeeti kodoyit. Aneeta Yesu gi. Ma ajolinu looc gaga.” ⁵¹ Iiya ni niini ototo kavool ki noogo. Taman noko itivane njooti. Ma abiir noogo dook ooti ototo ele, eeci jaan bakbaye noogo zinzeeti noko. ⁵² Mayo nuun icinit niigi gi baal anyeke niigi dayiin o miliny kizi meele e, jaan kagaac niigi dayiz o Yesu noko.

Arogoz Yesu ol ci amoor

⁵³ Mazi avo arum baagit o looc o kazi Genezaret, acabit kavool gogola njinaante. ⁵⁴ Mazi adujna kavoola, kataman noko agaac ol Yesu. ⁵⁵ Ma avironok ol korogjok ugeec. Ma avo adonjak niigi ol o amoor kuwane njinti aave Yesu o. ⁵⁶ Ma njinti olla akoyi Yesu kuturyowe o miliny, karabonj een kuturyowe o adikir, anyaa ol gonogi o amoor, ma avu arek looc melegenyai. Ma ilalek ol ci amoor o Yesu ka olla nuun kuomit niigi noono rum. Zin didi ol o uumit rum onin orogit moorizoye ugeec.

Keerane o ol o Parici

7 ¹ Ma alotak ol o Parici kibeem ol o demziinto avu Jerusalema Yesu. ² Ma acin niigi nuyak o Yesu adake ijaan kotoonyit azeen keere uneen. ³ Eeci goon ol o Parici kibeem ol o Juz oogi alaj adake ijaan kotoonyit azeen giye o agami niigi keerane o jijitigeec. ⁴ Goon ma anyaa dayiin melegenyai, alaj adak ijaan rak kotoonyit. Ma azooni buk niigi keerane ci meelik oogi kiyo onyen ci diicitu ki ijunya been alawet e.

⁵ Ivita ni ijinit ol o Parici kibeem ol o demziinto Yesu enektec ne, “Dim nuyawa cugune o goon alaj azooni keerane o jijitigaac o naa? Adake goon niigi calaj oony azeen o naa?”

⁶ Ma abedeke Yesu noogo anak ne, “Igeet ol ci abuuku eleeti koko, aduwa da baale nyakanani o kazi Izaya zozz ceen didi giye ci akanuj igeet. Ayeet baale niini zozz ci aduwa Jooi azi ne, Goon ol nicigi adinjijanan aneet utugetine doon. Maje zinzeeti cigeecc o adeyai jaatan many. ⁷ Alaj zin niigi agano jaati adinjijanan aneet, eeci arican niigi demziin ci keerane ugeecik ototo kujuk demziin ci zozz onan.”

⁸ Ma anak Yesu bodo noogo ne, “Aleem zin da Izaya didi. Alaj niiga azoonu lotinok o Joowo, bar azoonu keerane ci ol ci deer. ⁹ Aabaabanu niiga kiziik bar agenyu giye ci aburnu lotinok o Joowo, ma bar azoonu keerane cugooc o.

¹⁰ Ayeet Mosis baale zozz baal aricanek Jooi noono azi ne, Toghole baatun ki yaatun. Ma adom eeti baatin ki yaatin, abon aruk ol noono kadaak. ¹¹ Maje bar niiga ademzonu anonu ne, Ma alam gi ci ka kitirti eeti baatin karabonj een yaatin, abon anak noogo ne, Alaj katiritun igeet, eeci kanyeya gi nico Jook. ¹² Zin gole nico imilmilantu niiga noono calaj atirit baatin ki yaatin. ¹³ Ma buk gole nico epeztu niiga zozz o Joowo kizi gi ci labak kaale cugooc ademzeku ol noko. Ma anyak buk kaal oogi ci meel ger atobo kibeem nicoko goon agoonu niiga.”

Kaal o anyek eet kizi gerze njume o Joowo

¹⁴ Zin bodo otowa Yesu ol, ma aku anak ne, “Iziikto di niiga dook ka agaac zozz ci ka karoonj kuduwayun ce. ¹⁵ Akom laadun gi ci adak eeti ci deer otoga, ma anyek eet kizi gerze njume o Joowo kina. Bar zin gi o ger goon adujna zinize ci eet ci deer neen o agerezan noono. ¹⁶ Ma anyaku iin, iziyyit zozz nico jurun.”

¹⁷ Ma vurtu ook Yesu ceza otogek kole looc, ma avunak nuyawa noono, ma avu ajin keji ci demziin nico. ¹⁸ Ma anak niini noogo ne, “Alaj agayu keji ci demziin nico niiga buk? Abon waan agayu niiga dayiin o avo eet ci deer keja alaj anyek eet kizi gerze njume o Joowo. ¹⁹ Eeci dayiin alaj avo ziniza, bar avo keja ma adujnak bitaalin.” Aduwa Yesu gi nico o aronj ka keyelek ol gi o abonon dayiin dook jaati kadayi.

²⁰ Ma anak bodo Yesu noogo ne, “Bar zin gi o goon adujna eet ziniza neen o anyek noono kizi gerze njume o Joowo. ²¹⁻²² Eeci zinize ci eet ci deer o adujnan baabani ci gerze, ma anyek noono kutugu kaal ci ger kiyo waaj, ki agor, ki monyenet, ki zocmazit,

ki ziniz appinzet, ki labaan, ki madken, ki ñomtiin, ki eleeti donji, kibeem tarbalzet. ²³ Aduña kaal nici dook zinize ci eet ci deer, ma anyek nɔɔnɔ kizi gerze ñume o Joowo.”

Ñaa ci atuwe

²⁴ Zin itinja Yesu ook looce ci ajɔɔz kutur o kazi Tayor. Mazi ako arum ñinite, ook ceeze oman eecito, ma ako aavi ñinaante, eeci alaɗ arɔɔɗ niini keyelizak ol ele, bar zin ojokta niigi nɔɔnɔ. ²⁵ Ma ñinaante iziiwun buk nɔɔnɔ ñaa oman ci anyak beenyin miniñit ci Loryento. Iiyak ni niini nɔɔnɔ, ma aku aavek loota kɔpɔkpɔk. ²⁶ Maje ñaa nici niini dole ci modo o kazi Garik, ma aritai niini kuture o kazi Venosiya o abil looce o kazi Siriya. Ilalek ni niini Yesu ka kɔtɔk miniñit o Loryento dolece cin o. ²⁷ Ma abedeke Yesu nɔɔnɔ anek ne, “Nyan rak aneet kitirit ol ogan, eeci alaɗ abon ñaati kajukeke dayiin ci dolenu o orze.”

²⁸ Ma abedeke ñaa nɔɔnɔ anek ne, “Didi Manyi, ñedet aleem zɔɔz nico, bar zin goon buk orze aver zurzuryak ci iina ñaati adayin dɔlya labak.”

²⁹ Enek ni Yesu nɔɔnɔ ne, “Giye o uduwaye zɔɔz ci aleem, ɔtɔɔye miniñit o Loryento dolece unun. Bito ɔɔ labak.” ³⁰ Mazi ako ñaa ɔɔ, amada dole ɔɔɗ kerca. Akoma didi miniñit o Loryento ñaatin.

Atirit Yesu eet ci adiiti iina ki alemeti

³¹ Ma ñaaz Yesu kuture o kazi Tayor, ma ako adiiir kutur o kazi Sidon been kuturyok ween amɔtɔ, ma ako alocaak liil o kazi Galili. ³² Ma ñinaante anyaaktak ol nɔɔnɔ eet ci adiiti iina, ma alagonyi aati calaɗ azɔɔz. Ma ilalek niigi nɔɔnɔ ka kataadek eet nico aziit ka kitirit kizi maya. ³³ Alakada ni Yesu eet nico doon ɔla. Ma ako azuwek azeen iin ci eet nico o, ma oortek amot aziit, ma uum aat. ³⁴ Ma acin tammu tadena, ma akɔla ziniz, ma anek nɔɔnɔ otoge uneen ne, “Avta.” Ma keɗ ci zɔɔz nico azi ne ziiwo.

³⁵ Makacin didi ɔkɔlte eet nico iina ogine, ma buk oogji aati kɔzɔɔz labak enico ele. ³⁶ Ma aricanek Yesu ol dook anek ne, “Má aboranu zɔɔz nico.” Bar ma aricanek niini nɔɔɔɔ calaɗ abɔra zɔɔz ci abil nɔkɔ, bar avɔ aduwa niigi gi nico ɔɔɔɔ. ³⁷ Ma ol o azii zɔɔz nico abiir nɔɔɔɔ ooti ɔɔɔɔ, ma anɔ ne, “Kaala ci agɔɔn Yesu noko dook abon ɔɔɔɔ ele. Ma een nuun ol ci adiiti iina anyek niini nɔɔɔɔ kiziikto. Buk ol o adiiti alemeti anyek nɔɔɔɔ kozoosit labak.”

Anyek Yesu ol dayiin ci meelee

8 ¹ Ma ñintimiliny iinyaye ogen olotak bodo kɔle ci appe Yesu. Mazi ako adicai dayiin ugeec, otowa Yesu nuyak ogin, ma anek ne, ² “Inoko awuci ziniz ole nicoko, eeci karomena ki nɔɔɔɔ iinya iiyu, makacin idicai dayiin ugeec anyak. ³ Má kitoonei nɔɔɔɔ korogjok magizet nɔkɔ, avɔ koca aval gɔla, eeci ol ogen ñaatineen avu reena.”

⁴ Ma anek nuyawa nɔɔnɔ ne, “Mazin yo balale nico ka kojokta dayiin ci aleenɔ ki ol nicoko ñaadaɗ?”

⁵ Ma ajin Yesu nɔɔɔɔ anek ne, “Inoko anyaku ɗɔken ceen izɔk?”

Ma abedeke niigi nɔɔnɔ anek ne, “Kanyaka ɗɔken ceen torgerem.” ⁶ Uduwak ni niini kɔle kaavtiyo loota. Ma adoma ɗɔken ceen torgerem noko, ma anyek Jook zany, ma atɛet ɗɔken, ma anyek nuyak ka keɗeryek ol. Ma aɗerek niigi ol. ⁷ Anyak buk niigi kuluk ci miliny. Ma anyek bodo Yesu Jook zany kuluge nicoko, Ma anyek nuyak ka keɗertek ol buk. ⁸ Ma adake ol nicigi dook zee makacin ipiiyante. Ma alota nuyawa zurzuryak ci anyigzai o, ma abitiz gilanya torgerem. ⁹ Maje ol ci ona adak dayiin noko o een eet tur lak eet ram (4000). Azaanun ni Yesu nɔɔɔɔ kɔɔt korgine. ¹⁰ Ma ñintimiliny nɔkɔ ootodit niini ki nuyak ogin kavool, ma abaayiz liil avɔ looce o kazi Dalmanuta.

Acina ol o Parici dɔyiz o Yesu

¹¹ Zin ivitak ol ci Parici ogen Yesu, ma avu adajo ki nɔɔnɔ. Arɔɔɗ niigi kicinta Yesu, ma ajin nɔɔnɔ ka kutugu nɔɔɔɔ liɗliɗon ci atɛet biye ci aku Joowa. ¹² Ma akɔla Yesu ziniz, ma azi ne, “Ako ma arooɗnyu icinit liɗliɗon ci ateeduɗ biye o naa? Didile kaduwakuɗ igeet, alaɗ kayelekuɗ igeet liɗliɗon ci ateeduɗ biye been neen.” ¹³ Ma ooɗnek niini nɔɔɔɔ looc, ma atɔɔ kavool, ma ako liil baagita.

Ilot Yesu nuyak ogin kegenyit ole o Parici

¹⁴ Mazi awɔ niigi, erektek nuyak dayiin ñinaante, ma bar ajowa ɗokoc codoi ɗɔr nɔkɔ kavoola. ¹⁵ Ma anek Yesu nuyak ne, “Egenyit gerzitime o ol o Parici kibeem gerzitin o Erod o atobɔ ki nyigit o goon adeni ɗɔkena o.”

¹⁶ Bar nuyawa alaɗ aga keɗ ci zɔɔz ci aduwak niini nɔɔɔɔ o, ma aɗɔmtɔ anɔ ne, “Aduwa bɔɗ Yesu gi nico o, eeci akɔmnet ɗɔken.”

¹⁷ Maje Yesu aga ñomtiin cineen o nɔkɔ, ma ajin nɔɔɔɔ anek ne, “Aɗomotu zɔɔz ci akɔmnuɗ ɗɔken o naa? Ñaan dim niiga agayaɗ aneet nɔkɔ? Ñaan bakbaye igeet zinzeeti nɔkɔ? ¹⁸ Anyaku kebere, ma alaɗ acinenu. Anyaku iin, ma alaɗ aziinenu. ¹⁹ Alaɗ aadanu ɗɔken baal kanyi ol ween eet tur lak eet ram kamɔtɔ (5000) e? Mazi baale ipiiyante niigi e, alotanu waanice gilanya izɔk dayiine o anyigzai?”

Ma anek niigi nɔɔnɔ ne, “Kalotana gilanya amɔtɔ ram.”

²⁰ Ma bodo anek Yesu nɔɔɔɔ ne, “Abon buk aadanu ɗɔken baal kanyi ol ween eet tur lak eet ram (4000) e. Mazi baale ipiiyante niigi e, alotanu gilanya izɔk dayiine o anyigzai?”

Ma anek niigi nɔɔnɔ ne, “Kalotana gilanya torgerem.”

²¹ Ma anek niini nɔɔɔɔ ne, “Ñaan zin agayaɗ nɔkɔ o naa?”

Atirit Yesu eet ci ruben

²² Mazi avunak Yesu kibeem nuyak ogin kutur o kazi Bezediya, anyaaktak ol nɔɔnɔ eet ci ruben, ma ilalek niigi nɔɔnɔ ka kuum eet nico ka kɔkɔl nɔɔnɔ kebere. ²³ Ma agam niini eet ci ruben noko aziit, ma aduɗni akoyi kutur bitaala. Ma ñinaante otorek amot nɔɔnɔ kebere, ma ataadek nɔɔnɔ azeen, ma ajin anek ne, “Inoko anyak gi ci acin?”

²⁴ Ma adɔɗ ɛeti ci ruben noko ɔɔ, ma anek nɔɔnɔ ne, “Ii, kacin ol awɔ, bar olla ɛel kiyo keena o.”

²⁵ Ma bodo ataadek Yesu azeen nɔɔnɔ kebere. Enico egelem bodo ɛeti looc, ma acin kaal dook juruɗ, eeci ɔkɔlte nɔɔnɔ kebere wak. ²⁶ Ma anek Yesu nɔɔnɔ ne, “Inoko bito ɔɔ. Má amiironei kutur.”

Acuba Pitör jinen o Yesu

²⁷ Zin ɔ́wɔ́wɔ́ Yesu kibeen nuyak ogin ɔ́wɔ́ korogjowe o ajɔ́ɔ́wɔ́ looc o kazi Sisiriya Vilipai. Mazi ɔ́aan awɔ́ gola nɔ́kɔ́, ijin Yesu nɔ́wɔ́wɔ́ enek ne, “Gɔ́wɔ́n dim yo azi ɔ́l ne, Keen naana ɔ́neɛɛn?”

²⁸ Ma abedeke niigi nɔ́wɔ́wɔ́ anek ne, “Azi gɔ́wɔ́n ɔ́l ne, Een Jɔ́n o oony ɔ́l. Maje ɔ́l ogene azi ne, Een Ilija. Ma bar ogene azi ne, Een nyakanjan codoi nyakanjanete o Joowo.”

²⁹ Ma ajin niini nɔ́wɔ́wɔ́ anek ne, “Ma niiga gɔ́wɔ́n aniyu ne, Keen ɔ́neɛɛn?”

Ma abedeke Pitör nɔ́wɔ́wɔ́ anek ne, “Een niina Kiristo.”

³⁰ Iricanek ni Yesu nɔ́wɔ́wɔ́ ka calañ aduwak ɔ́l oogi zɔ́wɔ́wɔ́ nico.

Aduwa Yesu daayiz onin

³¹ Ma ademez Yesu nuyak ogin anek ne, “Iiten oma naana ɔ́ɛerti Eeto kapirna ɔ́wɔ́wɔ́t ele kaale ci meelik. Ma abornan ɔ́ɛere aneet alaata o miliny ki alaata o adikir ceze o Joowo been ɔ́l o demziinto buk. Arukan ɔ́ɛere niigi aneet kadaak. Bar zin iinyaye ceen iyyu kijaaz bodo daayiza.”

³² Oobek ni niini nuyak dook zɔ́wɔ́wɔ́ nico kagaac niigi dook juruɔ́. Mazi azii Pitör zɔ́wɔ́wɔ́ nico, akata Yesu doon, ma ako aricanek nɔ́wɔ́wɔ́ gi ci anek ne, “Má azi nɔ́kɔ́.”

³³ Bar ookci Yesu, ma agelem nuyak, ma agernyek Pitör anek ne, “Nye ɔ́aatan Loryen co, eeci baabani cune o alañ aku Joowa, bar baabani ci eet ci deer.”

³⁴ Otowa ni Yesu kɔ́le kibeen nuyak, ma aku anek ne, “Má arɔ́wɔ́ ɛeti konowan aneet, abon areyek nɔ́wɔ́wɔ́ ele onine, ma abon agama giden ki piryakzet ɔ́aati anuyan niini aneet. ³⁵ Eeci ɛeti ci arɔ́wɔ́ korogoz ele onin, bar akoloz. Maje ɛeti ci akoloz ele onin ɔ́aatan kibeen kaviyawe o Joowo, bar arogoz. ³⁶ Mayo zin inoko má anyak ɛeti kaal o loocu dook, ma bar akoloz roget ci ele onin, bonat inoo? ³⁷ Má adaak ɛeti, akɔ́m bodo gi ci ka kabadake nɔ́wɔ́wɔ́ roget onin. ³⁸ Zin ma anyak ɛeti alyaan ɔ́aatan ki zooze onan ole ci loocu ger noko, katin buk naana ɔ́ɛerti Eeto kanyei alyaan ɔ́aatin iitene ci kabadana naana been toonnyak o Joowo titinyonte o Joowo e.”

9 ¹ Ma anek bodo Yesu nɔ́wɔ́wɔ́ ne, “Didile kaduwakuɔ́n igeet, anyak ɔ́l oogi ɔ́aatunooɔ́n ɔ́jina ci katin alañ adaai ijaan kicinit niigi ɔ́oyiz o baliin o Joowo.”

Owo Yesu ele

² Ma vurta iinyaye ceen ɔ́rɔ́kɔ́nɔ́m ooyi Yesu Pitör ki Jemis been Jɔ́n be tadena, ma avɔ́ aavtiz niigi doon ɔ́jinaante. Mazi ɔ́aan aavtiz nɔ́kɔ́, otowo Yesu ele nɔ́wɔ́wɔ́ keberen nɔ́kɔ́. ³ Makacin rumane ogine iziti vɔ́wɔ́re per kizi kiyir kiyir kujuk rum ci vɔ́wɔ́r loota ɔ́jina. ⁴ Ma acin nuyawa Ilija ki Mosis baal adaayito baale e azɔ́wɔ́wɔ́ ki nɔ́wɔ́wɔ́. ⁵ Ma anek Pitör Yesu ne, “Manyi, kavu te ɔ́jina juruɔ́. Nyet ketɛɛnyacawa kaal ceen cezi kabili kɔ́r een iyyu, ka codoi kizi cun, codoi ci Mosis, codoi ci Ilija.” ⁶ Aduwa Pitör gi nico calañ aga, eeci niigi dook anyak ɔ́hɔ́liin ɔ́wɔ́wɔ́t.

⁷ Ma aku diizoc, ma aku abil nɔ́wɔ́wɔ́ tadena, ma azi mɔ́lɔ́yi ci Joowo diizoce nico ne, “Nicini ɔ́ɛeran o kareez neen. Iziiyit nɔ́wɔ́wɔ́.”

⁸ Taman nɔ́kɔ́ icinit nuyawa izi nɔ́wɔ́wɔ́ Yesu doon, ɔ́kɔ́ma Ilija ki Mosis.

⁹ Mazi aduɔ́na niigi be tadena, iricanek Yesu nɔ́wɔ́wɔ́ anek ne, “Má avɔ́ aduwaku ɔ́l gi ci ona acinu noko zee ma kako kijaaz naana ɔ́ɛerti Eeto daayiza.” ¹⁰ Oroodit ni didi nuyawa gi nico zinzeetine, maje ɔ́aato ajino niigi maany anɔ́ ne, “ɔ́jaazi daayiza akati keɔ́ cine gitaz?”

¹¹ Ma ajin niigi Yesu anek ne, “Ma dim gɔ́wɔ́n ɔ́l o demziinto azi ne, Arayai katin rak ɔ́wɔ́wa Ilija ɔ́aati Kiristo o, naa?”

¹² Ma anek niini nɔ́wɔ́wɔ́ ne, “Didi ɔ́ɛdet arayai rak Ilija ka kiiya kidimdiman gɔ́l o Kiristo. Azi warage o Joowo ne, Katin ɔ́ɛerti Eeto abor ɔ́l nɔ́wɔ́wɔ́, ma apirna niini ɔ́wɔ́wɔ́t. ¹³ Bar zin kaduwakuɔ́n igeet, Ilija iyya odota, ma utuguzek ɔ́l nɔ́wɔ́wɔ́ kaal ci ger eo arɔ́wɔ́n niigi kiyo ayeedi waragewe o Joowo o.”

Atirit Yesu logo ci anyak minijit ci Loryento

¹⁴ Mazi avɔ́ arum Yesu ki nuyak ceen iyyu o nuyak ogin oogi, acin kɔ́le ci aliya nɔ́wɔ́wɔ́, ma adañɔ́ ɔ́l ci demziinto kibeen nɔ́wɔ́wɔ́.

¹⁵ Mazi acin ɔ́l nicigi dook Yesu, ibiirit nɔ́wɔ́wɔ́ ooti ɔ́wɔ́wɔ́t ele, ma adokonyonek niigi nɔ́wɔ́wɔ́, ma avɔ́ azaa.

¹⁶ Ma ajin Yesu nuyak anek ne, “Ma dim adañonu kibeen ɔ́l nicoko naa?”

¹⁷ Ma azɔ́wɔ́wɔ́ ɛeti codoi ole ceen kɔ́le noko anek Yesu ne, “Manyi, kanyaakin ɔ́ɛeran ci anyak minijit ci Loryento, ma adiiti ɔ́wɔ́gi calañ azɔ́wɔ́wɔ́. ¹⁸ Gɔ́wɔ́n ma agam nɔ́wɔ́wɔ́ minijit nici, arui looc, ma aduɔ́na kavucaci otoga, ma adak nyigit, ma aciizen ele. Kajin uyene nuyak cugun noko ka kotooyit minijit nico ɔ́aatin, bar alañ anim niigi kotooyit.”

¹⁹ Ma anek Yesu nɔ́wɔ́wɔ́ ne, “Igeet ɔ́l ci akɔ́mnuɔ́n tuwen coko. Kayo koromte naana kibeen igeet zee been inin ka utuyɔ́? Ka kemez zɔ́wɔ́wɔ́ cunooɔ́n zee been inin? Anyaaktayan zin di logo nico ɔ́aato.”

²⁰ Ma anyaa niigi nɔ́wɔ́wɔ́ logo nico. Mazi acin minijit ci Loryento noko Yesu, taman nɔ́kɔ́ avic logoz, ma arui looc kɔ́bɔ́rɔ́bɔ́r kuduv ɔ́wɔ́gi. ²¹ Ma ajin Yesu baatin anek ne, “Akanan gi nici baal waja?”

Ma anek baati logoto nɔ́wɔ́wɔ́ ne, “Anyaa gi nico kidiczeta nɔ́kɔ́ laadun. ²² Lak ci meelik ger ci gɔ́wɔ́n ajukeke minijit nici nɔ́wɔ́wɔ́ goo karabɔ́n een liil arɔ́wɔ́n ka kuruk kadaak. Inoko kilalekin anyek ziniz kobona ɔ́aatinaaɔ́n. Tiritet minijite nico má anim.”

²³ Ma abedeke Yesu nɔ́wɔ́wɔ́ anek ne, “Naa akɔ́ba azi ne, Má anim o? ɛeti ci atu Jook anim kutugu kaal dook.”

²⁴ Taman nɔ́kɔ́ anek baati logoto Yesu ne, “ɔ́ɛdet naana katuwe. Tiritan zin tuwente can miliny noko ka kutuwu juruɔ́.”

²⁵ Mazi acin Yesu kɔ́le alotak nɔ́wɔ́wɔ́ nɔ́kɔ́, egerenyek minijit ci Loryento noko anek ne, “Niina minijit o adiiti logo nico otok, duna ɔ́aatin. Má abadaai bodo nɔ́wɔ́wɔ́ been neen.”

²⁶ Ma agereny minijit nici, ma avic logoz kataval ɔ́wɔ́wɔ́t ele, makacin uduna. Ma ɔ́wɔ́n logoti kazacane kiyo ɛeti o adaak o. Ma anɔ́ ɔ́l ci meelik ne, “Adaak ri logoti.” ²⁷ Maje bar Yesu agam logoz aziit, ma adañɔ́a kaavu jena.

²⁸ Mazi ako Yesu ɔ́lɔ́, ɔ́wɔ́t ijinit nuyawa ogine nɔ́wɔ́wɔ́ ɔ́aati ɛene nɔ́wɔ́wɔ́ doon anek ne, “Mate uyene akɔ́mneket ageeta ɔ́aati katooka minijit nico naa?”

²⁹ Ma anek Yesu nɔ́wɔ́wɔ́ ne, “Minijit nici alañ aaryai gaga. Ool nɔ́wɔ́wɔ́ ɔ́aryiin doon.”

Aduwa Yesu daayiz onin bodo

³⁰ Ma iḡaaz Yesu ki nuyak ogin ḡinaante, ma avo adiiir looc o kazi Galili. Maje Yesu alaḡ arɔḡḡ kagaac ol ogene nɔḡḡ ḡinti aave. ³¹ Eeci arɔḡḡ niini waḡi ci ka kedemezi nuyak. Ma anak niini nɔḡḡ ne, “Iiten oma agamnyan ol aneet ḡḡerti Eeto, ma avo arukan kadaak. Bar iinyaye ceen iyyi kiḡaaz bodo daayiza.” ³² Maje bar nuyawa alaḡ aga keḡ ci demziin ci aduwak Yesu nɔḡḡ o. Bodo ḡaato aḡole ḡaati aḡini niigi nɔḡḡ keḡ ci demziin nico.

ḡeneen ci titiny?

³³ Mazi avu arum niigi Kapernam, ɔḡḡ korge oman. ḡinaante iḡin Yesu nuyak anak ne, “ḡitaz ona adaḡonu ḡola e?” ³⁴ Ma aḡaki niigi jaḡ, eeci uyene ḡedet adaḡḡ ḡola arɔḡḡ kagaac ḡeneen ci titiny ḡaatineḡ. ³⁵ Aavu ni Yesu loota, ma awa nɔḡḡ dook amɔḡḡ ramana, ma anak ne, “Mā arɔḡḡ eeti kizi titiny, abon anyek niini ele onin kizi celbez ola dook, ma een gabaren ci ol dook.” ³⁶ Enico odoma Yesu dole ci miliny, ma aku anyek kibil nɔḡḡ ḡuma ḡaati ataadeke niini nɔḡḡ azeen, ma anak nuyak ne, ³⁷ “Ma eeti ci atalna dole ci miliny kiyo nici noko zaare ogan, atalnanan buk niini aneet. Ma eeti ci atalnanan aneet, alaḡ bar atalnanan aneeta doon, bar buk atalna niini Jook o itoonanan aneet.”

³⁸ Ma anak ḡon nɔḡḡ ne, “ḡayoi, iiten baale anyak eet ci kacina atɔḡḡ miniḡ o Loryento zaare ugun, ma kalamnya naaga nɔḡḡ, eeci alaḡ een niini nuyai kiyo naaga o.”

³⁹ Ma anak Yesu nɔḡḡ ne, “Mā alamnyu nɔḡḡ gaga, eeci eeti ci aḡɔḡḡ kaal ci adoi kiyo nici o zaare ogan, alaḡ amarninan niini aneeta. ⁴⁰ Ma eeti calaḡ amarninet ageet, niini laḡotinai. ⁴¹ Didile kaduwakuḡ iḡeet, ma eeti ci anyuḡ maam owodit giye o eeginu niiga nuyak cigan, aḡowa katin buk niini gi ci abon Joowa.”

Demziin ci akati cinaan oḡeca

⁴² Ma azi Yesu bodo ne, “Mā anyek eeti dole ci miliny kiyo nici noko kabaca oḡec, agano koca eeti nici ḡaati acaboneke nɔḡḡ golu alem, ma aḡukonek liil kotodode kook many.”

⁴³⁻⁴⁴ Zin mā abacakin aziiti oḡec, teeda. Maye bar ḡaati akoye rogeta aziite codoi kujuk ḡaati anyaye azeen dook, ma aḡukonei goo o abil been neen. ⁴⁵⁻⁴⁶ Mā abacakin zɔɔci oḡec, teeda. Maye bar ḡaati akoye rogeta zooce codoi kujuk ḡaati koca aḡukoneke goo o abil been neen. ⁴⁷ Mā abacakin kebereci oḡec, kata bitaalin. Maye bar ḡaati akoye baliinte o Joowo keberece codoi kujuk ḡaati koca aḡukoneke goo o abil been neen. ⁴⁸ Ma ḡin o gooyo anyak kuluut ci adak ol, ma alaḡ adaai nɔḡḡ been neen. Buk goo ci avaat nɔḡḡ o alaḡ adiiti nɔḡḡ been neen. ⁴⁹ Avaadi katin ol dook gooya zee ma amokcar kiyo mele o. ⁵⁰ Ma mele abona, bar mā idicai mokcarɔni, akom bodo ḡol ci kanyeke komokcar. Anyayit zin bonat o atobo kibeem mele. Abaayit niiga dook laḡotizeta been ganɔnta.”

Demziin ci akati ḡerɔn ci eeto kibeem ḡaa

10 ¹ Ma vurta itiya Yesu ook looce o kazi Judiya, ma ako abaayiz liil o kazi Jordan. Ma ḡinaante alotak kɔle nɔḡḡ bodo, ma ademez niini nɔḡḡ eo ḡɔḡḡ ademzi ol laadun.

² Ma avunak nɔḡḡ ol oḡen ole o Parici arɔḡḡ ka kicinta nɔḡḡ. Ma aḡin niigi nɔḡḡ anak ne, “Mayo ḡɔḡḡ lotinowa ogaac aziiknek eet kɔḡḡ ḡaa cin labak?”

³ Ma abedeke Yesu nɔḡḡ anak ne, “Ma da baale Mosis zooze nico anekuḡ ne?”

⁴ Ma azi niigi ne, “Aneket Mosis ne, Mā arɔḡḡ eeti kɔḡḡ ḡaa cin, abon labak, olla zin abon ayeedak niini nɔḡḡ warage ci ḡeronto.”

⁵ Ma anak Yesu nɔḡḡ ne, “Ayeedekeḡ Mosis zɔɔz nico o, eeci adoknuḡ iḡeet zinzeeti kak, ma alaḡ arooḡnyu iziikto. ⁶ Maje laadun waanbaal eenyane Jooi looc e, eenya niini eet ci mac ki ḡaa. ⁷ Zin nici gi o ḡɔḡḡ ooḡni eeti yaatin ki baatin, ma ako aromen ki ḡaa onin o neen. ⁸ Ma gole nico alaḡaan bodo niigi eegin ram, bar iziti ele codoi ḡor nɔḡḡ. ⁹ Zin giye o oromi Jooi ol nicoko kodoye, akom bodo eet ci deer ci ka keḡer nɔḡḡ.”

¹⁰ Mazi avo aavtiz nuyawa ki Yesu niigi doon ceeza, iḡinit niigi nɔḡḡ keḡ ci zɔɔz nico. ¹¹ Ma anak niini nɔḡḡ ne, “Mā atɔḡḡ eeti ḡaa cin, ma arɔca bodo ḡaa oma, adoma niini zocmaz. ¹² Buk mā aaryai ḡaa eete cin, ma ako arik bodo eete oman, adoma niini zocmaz.”

Amayuk Yesu dɔl ci miliny

¹³ ḡinaanto anyaaktak ol ogene Yesu dɔl ci miliny ka kamayuk niini nɔḡḡ. Maje nuyawa bar aḡerneyek ol nicoko kedeyai.

¹⁴ Mazi acin Yesu gi nico, otobor nɔḡḡ, ma anak nuyak ne, “Anycek dɔl kivitayan aneet. Mā alamnyu nɔḡḡ, eeci baliin o Joowo abilnek ol ci anyek eleeti kiyo dɔlya ci miliny noko. ¹⁵ Didile kaduwakuḡ iḡeet, ma eeti calaḡ agama baliin o Joowo zinize onin kiyo dole o miliny o, alaḡ ako niini baliinte nico been neen.” ¹⁶ Ma alotek Yesu dɔl keḡ, ma ataadek nɔḡḡ azeen, ma amayuk.

Akunak eeti ceen aroi Yesu

¹⁷ Mazi iḡaaz Yesu keronye onin, ivirak eeti oman nɔḡḡ, ma aku akani kozoḡti looc nɔḡḡ keḡa. Ma aḡin anak ne, “ḡayoi o abona, mayo kutugu naa ka kojowa roget o abil been neen?”

¹⁸ Ma aḡin Yesu nɔḡḡ anak ne, “Ako ma awuyan kizi eet ci kabona o naa? Akom eet ci abon. Jook doon ci abon. ¹⁹ Aga niina lotinok o Joowo azi ne, Mā amony eet ci deer. Mā adoma zocmaz. Mā aḡorze. Mā avoloḡ. Mā adaye ol looc. Tɔḡole baatun ki yaatun.”

²⁰ Ma anak eeti nici Yesu ne, “ḡayoi, lotinok nicoko dook kazoone baale kidiczeta e laadun.”

²¹ Ma agelem Yesu nɔḡḡ talniinta, ma anak ne, “Anyak zin gi codoi ḡor nɔḡḡ ci abon agoon. Bitɔ taalɔi kaal ugun anyei dook ka ḡerek guruc ol o amaati, ka iḡa nowawan niina aneet. ḡaan ako katin jowa niina aroḡzet tamma.”

²² Mazi azii eeti nici zɔɔz nico, alaca ele, ma awo ḡaati inoni ziniza gi nico ɔḡɔḡ ele, eeci anyak niini kaal ci meelik.

²³ Ma agelem Yesu nuyak ogin, ma anak ne, “Ol ceen aroḡ adoi kak ḡaati avoyi niigi baliinte o Joowo.”

²⁴ Ma abiir nuyak ooti zooze nico. Bodo anak Yesu nɔḡḡ ne, “Dɔl ogan, adoi kak ḡaati akoyi eeti baliinte o Joowo. ²⁵ Ol ceen aroḡ adoi ɔḡɔḡ ḡaati avoyi baliinte o Joowo kiyo alaḡ nyakale adunyonek nyibira ḡino vɔloḡ o.”

²⁶ Enico mazi azii nuyawa gi nico, ibiirit nɔɔɔ ooti ɔɔɔt ele, ma ajino niigi maany ano ne, “Mazi yo ɛneen ci ka keelyai korok?”

²⁷ Ma agelem Yesu nɔɔɔ, ma anak ne, “Ma eeti ci deer alaj anim korogoz ele dɔyize cin doon, bar Jook neen o arogoz nɔɔɔ, eeci kaala dook Joowa alaj adɔi.”

²⁸ Itiɲa ni Pitor, ma anak Yesu ne, “Mazin yo naaga ci kotonɲeya kaal ogaacak dook looc, ma kivita kunuyin ineet, kakana inin?”

^{29–30} Ma anak Yesu nɔɔɔ ne, “Didile kaduwakuɲ igeet, ma eeti ci ooɲ korok cin, karabɔɲ een gɔɔnɔgi ki ɲɔɔnɔgi, karabɔɲ een baatin ki yaatin, karabɔɲ een dɔl cigin, kibeen mana cin giye ci atuyan niini aneet, ki giye ci akati kaviyak o Joowo, ajowa niini loota ɲina kaal ci meelik kujuk kaal ci ooɲ niini o lak eet tur. Ajowa niini gɔɔnɔgi, ɲɔɔnɔgi, yaatigin, dɔl been maneen. Ma buk ajowa niini piryakzet liɲliɲonte nico, bar zin katin ɲaan ajowa niini roget o abil been neen. ³¹ Ma ɔl o titiny inoko, eegin niigi katin kaal ci labak. Maje ɔl o celbez inoko, katin niigi titinye.”

Ademez Yesu bodo zɔɔz ci akati daayiz onin

³² Ma awɔ Yesu kibeen nuyak avɔ Jerusalema. Arayin niini nuyak ɔɔwa, maje nuyak baranɲe nɔɔɔ zinzeeti nɔkɔ. Buk ɔl ci ano nɔɔɔ o anyak ɲoliin. Ma awa bodo Yesu nuyak ogin amɔtɔ ramana ka kuduwak nɔɔɔ doon kaal o ka kivitak nɔɔɔ. ³³ Ma anak nɔɔɔ ne, “Iziikto di! Inoko kavɔ naaga Jerusalema. Zin tiɲeere ɲinaante kako kanyonei naana ɲɛerti Eeto alaat o ceez o Joowo kibeen ɔl o demziinto. Ma avɔ apayekan niigi aneeta daayiz. Ma avoyan ole ween moden. ³⁴ Ma avɔ ararnan ɔl nica aneet, ma oortekan amot, ma arukan nyaboyen, ma vurta ɔɔt ni uruktan kadaak. Bar zin iinyaye ceen iiyu, ɲaan kiɲaaz bodo daayiza.”

Jinen o Jemis kibeen Jɔn

³⁵ Ma avunak Jemis ki Jɔn ween loɔz o Zebedi Yesu, ma avu ajin nɔɔɔ anak ne, “Gayoi, karoonyin da tuguweyet gi ci karoonyi ce.”

³⁶ Ma ajin Yesu nɔɔɔ anak ne, “Aroonyan kutuguweyɲ naa?”

³⁷ Ma anak niigi nɔɔɔ ne, “Katin waanci aave niina lecere unun alaazetu baliinte o Joowo titiny tammu tadena, karoonyi koromte naaga kibeen ineet ɲaati anyeke gɔɔn eet codoi ɲaatinaɲ kaavu ineet aza, maje codoi aavi ineet kaɲeta.”

³⁸ Ma abedeke Yesu nɔɔɔ anak ne, “Alaj agayu niiga gi ci ajinaɲ o. Animnyu kini niiga ipirta kiyo tiɲeere kako kapirna naana o? Ma buk kini animnyu daayiz kiyo tiɲeere kako kadaai naana o?”

³⁹ Ma anak niigi nɔɔɔ ne, “Ii, kanimnya labak.”

Ma anak Yesu nɔɔɔ ne, “ɲɛdet zin avɔ apirnanu kiyo tiɲeere kapirna naana o, ma avɔ adaɲnu kiyo kako kadaai naana o. ⁴⁰ Bar zin gi ci ka kaave ɲaatunooɲ eeti codoi aneet aza, maje codoi aavi kaɲeta o, alaj een gi can ka kanyuɲ. Eeci eɲera Jooi ɔl ci ka kaavtiyo vitenane nicoko laadun.”

⁴¹ Mazi azii nuyawa ween amɔtɔ gi nico, otobortek niigi Jemis ki Jɔn nɔɲ. ⁴² Otowa ni Yesu nɔɔɔ dook ɲaatodoi, ma anak ne, “Agayu ɲiga alaata o ɔl o alaj atu Jook, abal niigi ɔl ugeec dɔyiza. ⁴³ Ma zin gi nici alaj ɲaatunooɲ abil nɔkɔ. Mā eeti ci arɔɔɲ kizi titiny ɲaatunooɲ, abon niini een gabaren ci gonoginu. ⁴⁴ Mā eeti ci arɔɔɲ karaye ɔɔwa, abon niini een gabaren ci ɔl dook. ⁴⁵ Eeci yo nuun een aneet ele ɲɛerti Eeto, alaj kakun ka kiiya kilinɲiɲtozeyan ɔl aneet, bar kakun ka kilinɲiɲozek nɔɔɔ, ma kadaai ka korogoz ɔl ci meel.”

Atirit Yesu eet ci ruben kazi Bartimeyas

⁴⁶ Ma bodo avunak niigi kutur o kazi Jeriko. Mazi awɔ Yesu kibeen nuyak ki kɔle kuture nico, anyak eet ci ruben aavi gɔl kabanyca ɲinaante alaye. Kazi eet nico zaar ne Bartimeyas. Niini ɲɛerti eet ci kazi Timayos. ⁴⁷ Mazi azii niini nici Yesu ween eet o Nazaret, egereny izi ne, “Yesu ween ɲɛerti Devid, tiritan da!”

⁴⁸ Ma agernyek ɔl ci meelik nɔɔɔ ka kajawɔ. Bar enico agereny niini ɔɔɔt ele kujuk we azi ne, “ɲɛerti Devid, tiritan da!”

⁴⁹ Ibil ni Yesu, ma anak ɔl ne, “Utuyayan di nɔɔɔ kiiya.”

Ma avɔ awa niigi nɔɔɔ anak ne, “Talo! Tiɲa je. Awoyin Yesu.” ⁵⁰ Ma ajukek niini rum onin malkinto looc, ma iɲaaz jena taman, ma akunak Yesu.

⁵¹ Ma ajin Yesu nɔɔɔ anak ne, “Aroon kutuguweyin naa?”

Ma abedeke niini noko nɔɔɔ anak ne, “Gayoi, karoon kolan kebere kicinɔ bodo.”

⁵² Ma anak Yesu nɔɔɔ ne, “Bitɔ zin. Anyin tuwen unune ineet cinɔ.” Kataman nɔkɔ ɔkolte nɔɔɔ kebere ogine, ma ano niini Yesu gɔla.

Ako Yesu Jerusalema zigira

11 ^{1–2} Mazi avɔ ajɔɲɔz niigi Jerusalem, ɔɔtɔ niigi rak biye o kazi Kiɲiroc ajɔɲɔz kuturyok o kazi Bezpeja ki Bezani. Ma itoon Yesu nuyak ram anak ne, “ɔɔtɔ kuture ci kazi Bezpeja abil igeet ɔɔwa neke. Mazi avɔ arumnyu, ajowanu tedec jɔɔn ci zigiro ci ɲaan laadun kotoodit ɔl acabje ɲinaante. ɔkta ka anyaaktayan ɲina. ³ Mā anyak eet ci ajinɲ anekuɲ ne, ɔɔganu naa? Enektek ne, Arɔɔɲ Manyi. ɲintimiliny ɲaan abadakuɲ.”

⁴ Mazi avɔ niigi ɲinaante, amada didi jɔɔn ci zigiro acabje ɔlɔ araan otoga gɔl kabanyca. ⁵ Mazi ɔɔga niigi zigir, enektek ɔl ogen ole ci eel ɲinaante nɔɔɔ ne, “Gitaz ci agoonu noko? ɔɔganu jɔɔn ci zigiro noko naa?”

⁶ Ma aduwak niigi nɔɔɔ zɔɔz ona aduwa Yesu e. Otoɲit ni ɔl nici nɔɔɔ kooti zigir. ⁷ Ma anyaak niigi Yesu zigir. Ma avu ataadek nuyawa rumane ugeec malkinto zigir bawuc, ma aave Yesu tadena. ⁸ Maje ɔl ci meelik ogen avetek rumane ugeec malkinto gɔl. Maje ogene ateeda bɔlɔk ci anyarnyar ɲorta, ma avu avetek gɔl keɲ. ⁹ Maje ɔl o arayin Yesu ɔɔwa o kibeen ɔl ci anowa nɔɔɔ vurta o agereny ano ne, “Katanaaz Jook! Abon bai amayuk Jooi nɔɔɔ o aku zaare o Joowo. ¹⁰ Abon bai amayuk Jooi nɔɔɔ o ka kiiya kabal looc kiyo baale jijitinai Devid e.”

¹¹ Ook ni Yesu Jerusalema, ma ako eezee o Joowo, ma ako agelem niini kaal dook. Ma yomana imiirye niini ki nuyak ogin een amɔtɔ ram ɔɔt kuture o kazi Bezani.

Ator Yesu keet ceen moneec

¹² Mazi abada niigi Bezaniya ñeere, adawun Yesu magiz. ¹³ Ma acin niini reena keet ceen moneec anyak bɔɔk ci meel ɔɔt. Ma ako niini ka kook kicin karabɔŋ abiiir. Mazi ako arum, bar acin een bɔɔk doon, eeci alaŋ een iinya o gɔɔn abiirni monena neen. ¹⁴ Enek Yesu moneec nico ne, “Alaŋ bodo niina abiiir kadak eeti oman kebere cugun nɔko been neen.” Maje nuyawa azii zɔɔz nico nɔko.

Atɔk Yesu ɔl ceeze o Joowo

¹⁵ Mazi avɔ arum niigi Jerusalem, ook Yesu kaluwawe o ceez o Joowo eecitɔ, ma ako atɔwa ɔl o gɔɔn ataaline kaal kaluwawa eecitɔ kibeen ɔl o ataali. Ma uup tarabezɛt ci ɔl o gɔɔn abali guruc. Ma ajuk lecere ci ɔl o gɔɔn ataaline yeela. ¹⁶ Ma alaŋ anyek bodo niini eet oma kiiya kabatak kaluwa o ceez o Joowo ñaati iloli kaal cigin. ¹⁷ Edemez ni niini ɔl enek ne, “Azi Jooi waragewe onin ne, Awe ceez cane o kizi ceez ci ñaryiinto modeni dook, bar niiga anyceyu kizi ñinti avu aroodine agoryawa.”

¹⁸ Mazi azii alaata o adikir ceeze o Joowo kibeen ɔl o demziinto zɔɔz nico, orooŋit niigi gɔl ci ka kurukti Yesu kadaak. Amadik niigi nɔɔnɔ o, eeci abiiir ɔl dook ooti demziinte onin. ¹⁹ Ma yomana itingazɔ Yesu kibeen nuyak otoŋit Jerusalem.

Araabjai moneeci

²⁰ Ma iitene co ñeere mazi avu awɔ gɔla, icinit niigi moneec baale araabjai dook agerɔi buk. ²¹ Ma aada Pitɔr gi baal agɔɔn Yesu e, ma anek nɔɔnɔ ne, “Gayoi, cin di moneec baal ator e araabjai lai.”

²² Ma anek Yesu nɔɔgɔ ne, “Abon anyaku tuwen Joowa. ²³ Didile kaduwakuŋ igeet, mǎ anyak eeti tuwen Joowa, ma anek niini be nico ne, Piyai! Jukozek liil! Ma alaŋ anyak niini ziniza baabanok ram, gi nici agooni koca nɔko. ²⁴ Zin giye nico kaduwakuŋ igeet, mǎ anyak gi ci ajinu Jook ñaryiinta, agaac nɔko gi nici ñaan anyonekuŋ igeet. Zin ñaan anyuŋ Jooi didi gi nico. ^{25–26} Ma ñaryinu, abon uuŋnu kaal o ger anyayeku ɔl oogi zinzeetine ka buk Jooi ween baatunoŋ o aavi tammu tadena kotoŋ ñeeti ugooc.”

Jinen ci akati dɔyiz o Yesu

²⁷ Mazi abadaak niigi bodo Jerusalem, ook Yesu kaluwawe o ceez o Joowo, ma avunak nɔɔnɔ alaata o ceez o Joowo ki ɔl o demziinto kibeen ɔl o adikir baayizo. ²⁸ Ma avu ajin nɔɔnɔ anek ne, “Ma dim ñeneen ci anyin ineet alaazet ci atɔye ɔl balawaz ceeze o Joowo o?”

²⁹ Ma abedeke Yesu nɔɔgɔ anek ne, “Buk naana kajinuŋ igeet zɔɔz codoi ce. Mǎ abarzekan jinen can o gole ci aleemanu, kaduwakuŋ buk koca naana igeet alaazet can o aku ñaadaŋ. ³⁰ Uduktayan di, baale ñeneen baal anyek Jɔn dɔyiz ci aku oonyi ɔl e? Anyek Jooi yo eeti ci deer da?”

³¹ Ma adaŋ niigi maany anɔ ne, “Inoko mǎ kazi ne, Anyek baale Jɔn dɔyiz baal oonyene Jooi, azi koca Yesu ne, Ma da alaŋ zin atuwenu naa? ³² Buk mǎ kazi ne, Anyek Jɔn dɔyiz nice ɔl ci deer, aborneket koca ɔl ageet nɔŋ.” Anjole niigi o, eeci ɔl ci meel aga niigi Jɔn baale nyakanan didi.

³³ Ebedeke ni niigi Yesu enektek ne, “Alaŋ kagaya eet ci da anyek Jɔn dɔyiz o.”

Ma anek Yesu nɔɔgɔ ne, “Alaŋ zin buk kaduwakuŋ naana igeet dɔyiz ci kagɔɔne naana kaal nicoko o.”

Yabziin ci ɔl ci ger alinjliŋ mana

12 ¹ Ma anek Yesu nɔɔgɔ yabziinta ne, “Anyak baale eet ci aɔk keen ci gɔɔn agɔɔnane ɔl nyaantane mana. Olok ni mana juruŋ. Ma adawa look ci ka gɔɔn kamacoyek ɔl kebere ci keenu o. Ma eenya vaaco ci appe ka kebekti ɔl mana. Anyek ni niini mana ɔl ci ka keevit ka mǎ abiiir keena, ka keŋerit ki nɔɔgɔ. Eeron ni niini ook looce oman. ² Mazi awɔ abiiir keena, itoonek niini gabaren cin ɔl o alinjliŋ mana ka kiiya kiyiitek nɔɔnɔ keen kebere cigin. ³ Mazi aku arum gabarenti nici ɔl ci alinjliŋ mana o, agamit niigi nɔɔnɔ, ma aruk, ma anyek kimiire nɔko kɔkɔm kaal ci akɔyi kina. ⁴ Bodo itoona eeti o mano gabaren oma, ma avu aruk ɔl o alinjliŋ mana gabaren nico ɔɔt ele kanyak tuben ɔwa, ma amomoz nɔɔnɔ. ⁵ Bodo itoona niini gabaren oma. Enico uruyit niigi gabaren nico kadaak. Ma agoonek niigi kaal nicoko gabara ci meelee, oogi aruk korogit, oogi aruk kadaayitɔ. ⁶ Maje eeti ci mano noko anyak ñeerin codoi ŋɔr nɔko ci areez ɔɔt. Ma azi niini ne, “Atitiny tiŋeere niigi ñeeran.” Itoonek ni niini nɔɔgɔ ñeerin. ⁷ Mazi avɔ acin ɔl ci lijliŋonto noko nɔɔnɔ, izitɔ ne, “Niciini ñeerti eet o mano neen. Ivita kuruyit nɔɔnɔ kadaak ka kuula kaal dook kizi cigaac.” ⁸ Agamit ni niigi nɔɔnɔ, ma aruk kadaak, ma avɔ ajukek tuu mana bawuca.”

⁹ Ma ajin Yesu nɔɔgɔ anek ne, “Mazi yo inoko ma ako abada eeti ci mano o agoonek ɔl nicoko naa? Bar kane aku koca niini ma aruk ɔl ci baal alinjliŋ mana noko dook kadaayitɔ. Ma anyaa ɔl oogi ka kivita kilinjliŋit mana. ¹⁰ Kaga nɔko ekeebtu niiga waragewe o Joowo zɔɔz o azi ne, Ma be o abor ɔl o gɔɔn eenyet ceezi biyene, ma apɛz kizi gi ci labak, bar be o titiny ɔɔt kujuk biyen o enyiciinto dook neen. ¹¹ Jook zin neen o agɔɔn gi nico, ma gi nici gi ci panypany keteedet biye ɔɔt ele.”

¹² Mazi azii alaata o Juz yabziin nico, orooŋit kagamit Yesu, eeci aga niigi ariik niini nɔɔgɔ yabziinte nico. Bar bodo anjole niigi kole. Oɔɔzɔ ni niigi otoŋit nɔɔnɔ.

Meeri o aruwonek alaan o kazi Sizar

¹³ Ma itoonek alaata o Juz Yesu ɔl oogi ole o Parici kibeen ole o Erod ka kɔt kijinit nɔɔnɔ zozok ci ajin ka mǎ abarzek niini nɔɔgɔ gerze, ka kagamit nɔɔnɔ. ¹⁴ Ma avunak niigi nɔɔnɔ, ma avu anek ne, “Gayoi, kagayin naaga ineet gɔɔn azoos zozok ci aleema. Ma alaŋ anjole baabani ci ɔl oogi, ma alaŋ buk ari niina ziniz titinyɔn ci eet ci deer. Duwayet di, mayo abon ñaati karuweka meeri alaan o kazi Sizar, yo gerze da?”

¹⁵ Maje Yesu aga cinaan cineeŋ o nɔko, ma anek nɔɔgɔ ne, “Arooŋnyu icintawan naa? Anyaakta di zin gurucoc ceen ziiit anyan kicin.”

¹⁶ Ma anyek didi ɔl nɔɔnɔ gurucoc, ma ajin Yesu nɔɔgɔ anek ne, “Ma ñum ceeni kibeen zaar ci ayeedonek gurucoc nico ci ñene?” Ma abedeke niigi nɔɔnɔ anek ne, “Ŋum o alaan o kazi Sizar kibeen zaar ogin.”

¹⁷ Ma abedeke Yesu nɔɔgɔ anek ne, “Anycek zin Sizar gi o akati nɔɔnɔ. Maje gi o akati Jook, anycek Jook” Mazi azii niigi Yesu azi nɔko, olla apanante pan.

Demziin ci akati ɲaazi daayiza

¹⁸Ma bodo avunak Yesu ɗɗo o ogen ole o kazi Sajuzi goon abaaban niigi azi ne, ɗɗo o adaai alaɲ bodo ɲaaz daayiza. Ma avu ajin niigi Yesu anek ne, ¹⁹“Gayoi, baale ayeedeket Mosis lotinok ci azi ne, Mā adaai eeti, ma oonja ɲaa cin ɲaaz kanyak ɗɗo, abon arigiz gotonnya ci arogi o ɲaa ka kitirak ɗɗo ka kavada noono. ²⁰Zin baale anyak goton ceen torgerem. Ma aroce abuuwi, ma adaai ɲaaz kitirak ɲaa ɗɗo. ²¹Irigizun ni gotonnya ci anowa noono o ɲaa. Bodo buk adaak niini ɲaaz kitirak ɲaa ɗɗo. Ma arigiz bodo gotonnya o anowa noono ɲaa, ma adaai buk ɲaaz akom ɲaa ɗɗo. ²²Ma azop daayizi niki kibeem ɲaa nico loɗo ceen goton noko zee makacin idicai niigi dook torgerema kokoma ɗɗo ci arita. Ma vurma adaawun buk ɲaa. ²³Duwayet zin di, katin ma ɲaaz ɗɗo daayiza, ɲaa niki akati ɲaatineɗ ɲeneɗ? ɲaabaal azobtoi niigi dook ɲaa nico.”

²⁴Ma abedeke Yesu noono anek ne, “Abacu niiga gi nico arɗot, eeci alaɲ agayu waragenya o Joowo kibeem dayiz onin. ²⁵Katin ma ɲaaz ɗɗo daayiza, alaɲ bodo aroce, bar eelit niigi kiyo toonnyawa o Joowo o. ²⁶Zin giye ci akati ɲaazi daayiza, baale uduwak Jooi Mosis iitene baal abilni Mosis lugurgoce o alanyit e gi ci anek ne, Keen naana Jook o Ibrayim ki Aizak been Jakob. ²⁷Alaɲ een zin niini Jook ci ɗɗo o adaai, bar Jook ci ɗɗo o arogi. Zin Ibrayim ki Aizak been Jakob yo nuun adaayito o, ɲaaz niigi arogi noko. Abacu niiga zɗɗo nico.”

Lotinet o titiny

²⁸Ma aku eeti codoi ole o demziinto, ma aku azii ɗɗo ɲaati adaɲon kibeem Yesu. Mazi acin niini Yesu alɛema kaal o ajin ɗɗo noono dook noko, ijin buk niini noono anek ne, “Mayo lotinowe dook lotinet jaɲ ci titiny arɗot?”

²⁹Ma abedeke Yesu noono anek ne, “Lotinet ci titiny arɗot neen o azi ne, Iziikto ɗɗo o Israyil, Manyi onai neen Jooi doon, ma adoyi niini ɗɗo noko. ³⁰Ereezit zin Jook ween Manyi unooɲ zinzeetine ugooc dook, ki rogete unooɲ dook, ki baabaninte unooɲ dook, kibeem dayize unooɲ dook. ³¹Bodo lotinet ci titiny ano goon nico neen o azi ne, Ereezit ɗɗo o abaawonu kiyo areezu eleeti ugooc o. Akom zin bodo lotinet ci titiny arɗot kujuk lotinok ceen ram noko.”

³²Ma anek eeti ci demziinto noko Yesu ne, “Gayoi, aleem didi niina gi ci azi ne, Adoyi Jooi ween Manyi ɗɗo noko, ma akom bodo Jook oma o. ³³Abon didi kareez naaga Jook zinzeetine ogaac dook, kibeem baabaninowe ogaac dook, kibeem dayizowe ogaac dook. Abon buk kareez ɗɗo o kabaawo kiyo kareez naaga eleeti ogaac o. Lotinowa nicigi dook titinye kujuk todoyok o kavaat gooya kibeem taabinet oogi o kagoonek Jook.”

³⁴Mazi acin Yesu eet nico abarzek noono zɗɗo aritun noko, anek ne, “Alaɲ adeyai niina baliinte o Joowo.” Enico akoma eet ci anim bodo kijin Yesu. Otoɲole niigi noono ɲaati ajini, eeci ateeza niini noono.

Demziin ci akati Kiristo

³⁵Ma vurma mazi ademze Yesu ceeze o Joowo, anek niini niini ɗɗo ne, “Abac alaata o demziinto zɗɗo o azi ne, Kiristo niini ɲeerti Devid. ³⁶Eeci baale anyek Vɗɲizi o Joowo Devid kizi ne, Anek Jooi Manyi onan ne, Aavu niina libire can azo o zee ma kanyin rocek modo ugun amarninin ineet looc zɗɗo. ³⁷Mazi awo Devid alya Kiristo kizi Manyi cin. Zin bodo Kiristo een ɲeerti Devid ku?”

Ilot Yesu ɗɗo kegenyit ole o demziinto

Ma atalne ɗɗo ci meelik arɗot ɲaati aziɲni demziin o Yesu. ³⁸Ma ademz niini noono anek ne, “Egenyit ole o demziinto goon awo rumanene ci wuntik alina, ma areez zaawanet ci atitinyi ɗɗo noono melegenya. ³⁹Ma areez niigi ɲaati aavtiye lecerene ci titiny ceezine o lotento. Ma areez viten ci titiny aavtiye ɲaati goon aloten ɗɗo azoli dayiin. ⁴⁰Adak goon niigi kaal ci ɲaai o boi, ma ayselza eleeti ɲaati aɲayin ɲinti wun. Zin ɗɗo nicigi katin ajowa niigi Joowa payiin ci ger arɗot.”

Muci ci ɲaa o boi

⁴¹Mazi aku aavi Yesu loota ɲaao ajɗɗɗo loidon o goon arek ɗɗo mucu o ceez o Joowo, icinun niini ɗɗo ɲaati aarane guruc. Ma acin niini ɗɗo ci meelik ole ween arɗo aara guruc ci meelik. ⁴²Iiya ni ɲaa ci boye amaata, ma aku aruk milinyet ceen ram. ⁴³Otowa ni Yesu nuyak ogin, ma anek ne, “Didile kaduwakuɲ igeet, ma ɲaa ci boye amaata noko uruk niini guruc ci meelik kujuk ɗɗo dook. ⁴⁴Eeci ɗɗo ogen aruk niigi guruc ci aɲera guruce ugeec meelik, maje ɲaa niki aara niini guruc ogin dayiino dook.”

Aduwa Yesu oyoyinet o ceez o Joowo

13 ¹Mazi aduɲna Yesu ceeze o Joowo, anek nuyaiti codoi nuyawe ogin ne, “Gayoi, cin di ceez ci Joowo noko kibeem biyen ci eenyine noko alina arɗot ele.”

²Ma anek Yesu noono ne, “Acin ceez ci Joowo appe noko. Oyoki katin kazaantozek biyen niki dook looc, kokom codoi ataadonek gon.”

Yelzan o aɲorneke looci

³Mazi ako aavi Yesu biye o kazi Kiɲiroc ɲaati acini ceez o Joowo, ivitak noono Pitɗo ki Jemis ki Jon kibeem Andoru, ma avu ajin noono ɲaati aave doon. ⁴Anek ne, “Duwayet di ma kaala niki agooni tiɲa. Duwayet buk, tiɲeere ma ka kakatai kaala niki, kaga ku izi iitene cineɲ ajon o?”

⁵Ma anek Yesu noono ne, “Egenyit! Má anyeku eet oma kalabawuɲ. ⁶Anyak katin ɗɗo ci meelik azɗɗo zaare cigan avu katin azi ne, Aneeta Kiristo neen. Alabek zin katin niigi ɗɗo tuu. ⁷Mazi katin aziɲnu oroonok ci ajon kibeem awaɲ ci oroonok ci reen, má anyeku zinzeeti kivirit, eeci kaal niki ɲedet katin agooni, bar zin ɲaaz rak koɲorei looci. ⁸Katin ɗɗo ci looc oma ɗɗo ɗɗo ci looc oma. Ma amoot ɗɗo kirakirak loocowe ogen, ma anyak loocowa tarjo. Zin nicigi kanaan ci looc libento, ma abil olla kiyo wucezi o goon aami ɲaa dole o.

⁹Egenyit zin niiga alya. Agamnyuɲ katin ɗɗo igeet, ma avoyuɲ ceezine o roonnyo. Ma adookuɲ ceezine o lotento. Ma avoyuɲ alaata o abal ɗɗo. Zin giye o atuyaɲ niiga aneet, animnyu katin niiga uduktak noono zɗɗo onan een didi. ¹⁰Zin rak ɗɗo ma ɲaaz koɲorei looci, uuwawonek rak kaviyawa o Joowo moden dook. ¹¹Zin ma agamnyuɲ ɗɗo igeet, ma avoyuɲ roonnyo giye o atuyaɲ niiga aneet, má anyeku zinzeeti kivirit giye ci ka uduktu. Ma iya iitene nica olla uduktu zɗɗo ci anyuɲ Jooi igeet, eeci alaɲ azooyu

niiga dɔyize cunooŋ doon, bar Vɔŋiz o Joowo nɛn o ŋaan anyuŋ igeet ozoozit. ¹² Buk katin gɔɔn eeti ce akɔyi gɔɔni daayiza. Maje eeti ce akɔyi ŋeerin daayiza. Maje buk dɔlya amarnin baatigeec ki yaatigeec, ma avɔyi nɔɔgo daayiza. ¹³ ɔl dook katin amarninuŋ igeet, eeci atuyay niiga aneet. Zin eeti ci agam ele zɛɛ ma aɔrneke lɔci arogoz Jooi nɔɔnɔ. ¹⁴ Abon agayu keŋ ci zɔɔz oma ce juruŋ. Ma acinu katin ceeze o Joowo manyilibe o ger ɔɔɔt, abon ɔl o Judiya avironek biyen. ¹⁵ Mā aavi eeti ceez tadena, abon aduŋna, ma adɔkɔny enice calaŋ akɔ ceeza tɔ ka kook kodoma kaal ogin. ¹⁶ Mā aavi eeti mana, abon avir enice calaŋ abadaak kɔɔk ka kodoma rum cin malkinto. ¹⁷ Nɔŋ ci ger katin ŋaane o anyake iinyaye niceke, kibeen ŋaane o arɔkti. ¹⁸ Ijinit Jook ŋaryiinta ka calaŋ iina kaal nica lɔla. ¹⁹ Eeci iinyaye niceke anyak lɔci liben ci ŋaan laadun kiita ŋaan baal eenyane Jooi looc e zɛɛ been inoko o. Ma alaŋ buk katin bodo iina gi ci abil nɔkɔ. ²⁰ Mā da calaŋ ateet Jooi iinya niceke kizi kidice, akɔm koca eet ci arogi. Bar zin giye o ka korogti ɔl ogine aŋera, anyewun niini iinya niceke kizi kidice.

²¹ Zin iitene nice mā anyak eet ci anekuŋ nɛ, Icinit di Kiristo ceeni, karabɔŋ anekuŋ nɛ, Nɔɔnɔ nɛn caana, mā aziŋnu nɔɔnɔ. ²² Eeci katin anyak ɔl ci anyek eleeti kizi Kiristo kibeen ɔl ci anyek eleeti kizi nyakananet. ɔl nicigi katin agɔɔn kaal ci ateet ɔl biye ka kalabtai ɔl o aŋera Jooi. ²³ Egenyit zin, eeci kuduwayuŋ kaal nicoko dook maŋaan kakati o.

Kuni o Ŋeerti Eeto

²⁴ Bar zin iinyaye ci ano looc liben nice ookci ii kizi koli, ma alaŋ nyelɔyi alanyit. ²⁵ Maje monyonya iina tammu tadena, maje kaala o eel tammu bɔbɔra amɔɔt, ma ookci. ²⁶ Zin iitene nice ŋaan acinan katin ɔl aneeta Ŋeerti Eeto ŋaati kakune diizwani dɔyize ci appe kibeen titinyonta. ²⁷ Ma kitooŋ katin toonnyak o Joowo kɔɔt kuluta ɔl o aŋera Jooi looc libirɔ dook.”

Demziin ci akati moneec

²⁸ Ma azi Yesu bodo nɛ, “Ojokta niiga zɔɔz nico keete ween moneec. Gɔɔn mā uvurutit oto ogine, ma aryek bɔlɔk ci colai, kaga izi ŋinti ka kiiyai lɔla. ²⁹ Zin buk mā acinu liben nico, agaac niiga kize naana aŋɔn ɔɔɔt ele ka kiiya. ³⁰ Didile kaduwakuŋ igeet, ɔl ogene katin ole ci arogi inoko o alaŋ adaai zɛɛ ma acin liben nico ŋaati iinane. ³¹ Tammu taden kibeen tɔdɔ katin adicai, maje zɔɔz onane abil kelemnyai nɔkɔ been nɛn.

Akɔm eet ci aga iiten ci aɔrneke lɔci

³² Akɔm eet ci aga iiten ci katin iinane kaala nici o. Buk toonnyawa o Joowo alaŋ aga. Naana alya Ŋeerti Joowo alaŋ buk kaga. Bar aga baaba doon. ³³ Ebeyit zin eleeti eeci alaŋ agayu iiten nice aku tiŋa. ³⁴ Atobɔ zɔɔz nici kibeen zɔɔz o eet o eɛɛn o. Mazi ka keɛɛn, aricanek niini gabara ogin zɔɔz ci ka kuzuuti kɔɔk. Ma anyek gɔɔn gabaren co liŋliŋɔn cin doon. Ma aricanek buk niini eet o abek araan ka kebek araan juruŋ. ³⁵ Egenyit zin! Iziti vilile, eeci alaŋ agayaŋ niiga aneet kakun tiŋa. Karabɔŋ kakun yomana, karabɔŋ een baalin keŋa, karabɔŋ een ŋaati amamani tammu, karabɔŋ een ŋeere. ³⁶ Zin mā kakunakuŋ boyonyoŋ, abon kajowanuŋ eeginu vilile calaŋ ooginu. ³⁷ Ma gi ci kaduwakuŋ igeet noko, kaduwai buk ɔl dook. Kiziti vilile.”

Arɔɔŋ alaata kuruyit Yesu

14 ¹ Inoko eelit iinya raman ci ka kulutɔi ɔl ka kadakti dayiin o aadane vardaŋinet. Buk iiteni nici iiten o gɔɔn adayi niigi dɔken calaŋ amokcar. Orooŋit ni alaata o ceez o Joowo kibeen ɔl o demziinto gol ci ka kagamti Yesu ka kuruyit nɔɔnɔ kadaak kɔkɔm eet ci aga. ² Ma anɔ nɛ, “Alaŋ abon ŋaati kagɔɔni nɔkɔ iitene ci aadane ɔl vardaŋinet o, eeci koca ayoket ɔl.”

Aɔuutek ŋaa oman Yesu karacoc ɔɔ Bezaniya

³ Maje Yesu aavi kuture o kazi Bezani adake ole o Saiman baal anyak mɔɔriz o gidan e. Mazi ŋaan adake nɔkɔ, iiyak nɔɔnɔ ŋaa oman anyaa ketezewoc ci anyak karacoc o kazi narat ci ataalyai guruce ci meelik ɔɔɔt. Ma alip ŋaa nici ketezewoc inyaa, ma aɔuuteke niini Yesu karacoc nico ɔɔ. ⁴ Bar ŋinaante otoborit ɔl ogen nɔŋ, ma anɔ nɛ, “Mayo aminanji laadun karacoc gaga naa? ⁵ Abon waan ataaline karacoc nico ka kojowa guruc ci meelik ka kanyek ɔl ci amaati.” Ozoozit ni niigi ŋaa nico ɔɔɔt, ma arɔɔŋ kanyaaktak nɔɔnɔ alyaan.

⁶ Ma bar anek Yesu nɔɔgo nɛ, “Amilanu ŋaa nico zɔɔza gaga naa? Otoŋit nɔɔnɔ. Agoonekan niini aneet gi ci abon. ⁷ Aromenu niiga kibeen ɔl ci amaati o ŋina. Mā arooŋnyu itiritit nɔɔgo, ŋaan atiritu, maje naana alaŋaan bodo kaave ŋaatunooŋ been nɛn. ⁸ Ma ŋaa nici agɔɔn gi ci anim niini kutugu. Aɔuutekan niini aneet karacoc o ka kidimdiman dawiiŋ onan ma ŋaan kadaak o. ⁹ Didile kaduwakuŋ igeet, tiŋeere loocowe o uuwayi ɔl kaviyak o Joowo dook, aduwa buk ɔl gi ci abon agɔɔn ŋaa nicini noko, ma aada ɔl nɔɔnɔ giye nico.”

Ayelek Judaz Yesu Alaati

¹⁰ ɔtɔɔ ni Judaz Iskariyot ween nuyai codoi nuyawe ween amɔtɔ ram ook alaate o adikir ceeze o Joowo ka kook kuduwak nɔɔgo gol ci agami niigi Yesu. ¹¹ Mazi avɔ azii niigi gi nico, ataltɔ ɔɔɔt ele, ma anek niigi nɔɔnɔ nɛ, “Mā aduwaket gol ci kagamnya Yesu, kanyin koca guruc.” Orooŋun ni Judaz gol ci ka keyeleke nɔɔgo Yesu.

Adake Yesu ki nuyak ogin

¹² Ma iitene o oowu iinyaye o gɔɔn adayi ɔl o Juz dɔken o alaŋ amokcar, otodoŋit niigi nyɔɔ ci ka kaadai vardaŋinet. Ma ajin nuyawa Yesu anek nɛ, “Koota yo ŋaadaŋ ka koota kidimdimanta dayiin ci kaadane vardaŋinet?”

¹³ Otowa ni Yesu nuyak ram, ma anek nɔɔgo nɛ, “ɔtɔɔ Jerusalem. Avɔ arumonu tedec ŋinaante kibeen eet ci anyak maam ija. Oneec zin nɔɔnɔ. ¹⁴ Mazi akɔ arum eeti ci anuyu noko kɔɔk, enektek eet ci korgu o nɛ, Anekin gayoiti nɛ, Abil ceez ci ka koota kadakta ki nuyak ogan dayiin o kaadane vardaŋinet ŋaadaŋ? ¹⁵ Ŋinaante ŋaan ayelekuŋ niini ceez ci eenyi gɔn tadena ci anyak kaal dook o karɔɔŋ naaga kadakti dayiin. ɔtɔɔ zin utuguz dayiin cigaac ŋinaante.”

¹⁶ Ma iŋaaz nuyawa avɔ Jerusalem, ma avɔ didi ajowa kaal dook e ona aduwake Yesu nɔɔgo e. Ma adimdiman niigi dayiin o aadane vardaŋinet.

¹⁷ Ma yomana ivita Yesu kibeen nuyak ween amɔtɔ ram ɔtɔɔ ŋaa ona agoonine dayiin e. ¹⁸ Mazi avɔ adake, enek niini nɔɔgo nɛ, “Didile kaduwakuŋ igeet, ataalinan tiŋeere eeti codoi ŋaatunooŋ igeet ele ci kazɔlɔ noko.”

¹⁹ Ma abaaban nuyawa gi nico zinzeetine ɔɔɔt ele, ma anek gɔɔn ceeni Yesu nɛ, “Ci aduwa o aneeta gi? Aneeta gi?”

²⁰ Ma anek Yesu nōwō ne, “Eeti codoi ŋaatunooŋ igeet ci eeginu amōto ram kazōlo kodooce codoi noko akō tiŋeere ataalinan aneet. ²¹ Mazin naana Ŋeerti Eeto ŋaan kadaai eo aduwan warage o Joowo laadun. Bar zin nōŋ ci kol eete ci ataalinan aneeta Ŋeerti Eeto alaate o. Maya da bar niini ŋaati alaŋ aritan been neen.”

²² Mazi ŋaan adake niigi nōko, odoma Yesu dokoc, ma anyek Jook zany, ma atēet dokoc nico, ma aŋerek nōwō anek ne, “Adayit. Nicini ele onan neen.”

²³ Bodo adoma diic ci anyak nyaan, ma anyek Jook zany, ma anyek nōwō kowodit. ²⁴ Ma anek niini nōwō ne, “Nicigi biye ogan ađuuti ka kojokta ol ci meel bonat. Ma biyeta nici idica terkediin baal aterkedek Jooi ol ogin aŋera niini e. ²⁵ Didile kaduwakuŋ igeet, alaŋ bodo kawudi nyaan nico nōko zee ma kako kawudi nyaan ci colai balliinte o Joowo.”

²⁶ Ebenit ni niigi enico beniin ci Joowo, ma awō avō biye o kazi Kinjiroc.

Aduwa Yesu danjiin o Pitōr

²⁷ Ma anek Yesu nōwō ne, “Niiga dook aviryu tedec otoŋteyaŋ looc. Eeci azi Jooi waragewe onin ne, Karui tiŋeere eet o towawiinto kazaante eezana. ²⁸ Zin tiŋeere mā kitiŋa naana daayiza, kako Galiliya owa ŋaatunooŋ. Ŋaan zin kavō karumō ki igeet ŋinaante.”

²⁹ Ma anek Pitōr nōwō ne, “Mayo nuun avir ol dook, alaŋ naana kavir ŋaatun kotoŋeyin looc been neen.”

³⁰ Ma anek Yesu Pitōr ne, “Didile kaduwakin ineet, adaŋnye tija zee been lak iiyu ŋaan kōrōk toloci lak ram.”

³¹ Maje bar Pitōr aduv oŋot azi ne, “Mayo nuun ka kadaayit ki ineet, alaŋ bai kadaŋnye nōko been neen.” Ma aduwa buk nuyawa dook zōwō nico.

Aŋarye Yesu Gezemaniya

³² Mazi avunak niigi ŋino kazi Gezemani, enek Yesu nuyak ne, “Aavtiz ŋina. Kako rak naana kaŋarye ŋaate.” ³³ Ma akōyi niini Pitōr ki Jemis ki Jōn. Ma akunak nōwō inoni ci appe oŋot. ³⁴ Ma anek niini nōwō ne, “Kanyei naana ziniza inoni ci appe oŋot ci ajonini daayizi. Aavtiz zin niiga ŋina ebeyit eleeti ŋaryiinta.”

³⁵ Ma iicak niini kidicilim, ma abayek ele looc, ma ajin Jook ka kozooti nōwō calaŋ apirna daayiza. ³⁶ Ma ajin Jook azi ne, “Baaba, aboke kaala dook ŋaatun. Nyeyi zin piryakzet ci ka kiiyayan noko ŋaatan. Bar zin tugu eo arōŋe niina, alaŋ een eo karōŋe naana.”

³⁷ Mazi abada ŋaryiinta, amada nuyak ween iiyu e oogin. Ma anek niini Pitōr ne, “Saiman, ooginu naa? Akōmnekuŋ ŋaati abeyinu ŋaryiinta ziit codoi tōr nōko? ³⁸ Iziti vilile. Aŋaruyō ka calaŋ acinanuŋ Loryen zinzeeti zee ma agoonu oŋe. Eeci zinzeeti ugooc arōŋ kutuguzō kaal ci abon, maje bar eleeti cugooc o alaŋ anyak dōyiz.”

³⁹ Bodo amiiri niini, ma ako aŋarye aduwa zōwō we ele. ⁴⁰ Mazi abadaak nuyak, amada nōwō oogin bodo, eeci adoŋ niigi oŋot. Mazi iijka niini nōwō, alaŋ aga niigi gi ci ka kuduktak nōwō.

⁴¹ Ma ako bodo ŋaryiin zee mazi abada ŋaryiinta eecen lak iiyu o, amada nuyak bodo oogin. Ma anek nōwō ne, “Ŋaan dim ooginu ayubuzu nōko? Odot zin. Iiya ziiti o ka kipirai. Inoko kanyozozeya naana Ŋeerti Eeto ol o oŋenu. ⁴² Itiŋgaz! Kōtōwō! Icinit di, eet o ka kataaloyan nica izi aŋōn.”

Agam ol Yesu

⁴³ Mazi ŋaan azōwō Yesu nōko, urum Judaz Iskariyot looc. Oŋkōra niini ki kōle ci anyak kabazwa ci wuntik kibeen keen ceen ŋolonet. Ma ol nicoko itoona alaata o adikir ceeze o Joowo ki ol o demziinto kibeen ol o baayizo titiny. ⁴⁴ Maje Judaz uyene uduwak ol nicoko gi ci anek ne, “Eeti ci kako ŋaatin, ma kacoco nōwō ŋalyamoc zaawinta o, eet ci arooŋnyu o neen. Agamit nōwō, ma abeku juruŋ ka calaŋ avir ŋaatunooŋ.”

⁴⁵ Iiya ni Judaz, ma ako ŋaati Yesu, ma azaa niini Yesu azi ne, “Gayoi.” Ma acoco nōwō ŋalyamoc. ⁴⁶ Ma avu ol ci ona oŋkōra ki nōwō o, ma agam Yesu. ⁴⁷ Ovoca ni eeti codoi ole o aavtiz ŋinaante kabaz tibila, ma aruk gabaren ci alaan o adikir ceeze o Joowo keteeda itat, por.

⁴⁸ Ma anek Yesu nōwō ne, “Akō ma avunakaŋ kabazwani ki ŋolonete kiyo avunaku eet ceen agoryai o naa? ⁴⁹ Tup nōko gōwō karome ki igeet ceeze o Joowo adikir ŋaati kademzine, ma ŋaan agamtaŋ niiga aneet. Bar zin inoko gi o aduwa warage o Joowo baale didi ibil tō.”

⁵⁰ Zin ivirit nuyawa dook otoŋtek Yesu doon looc.

⁵¹ Ma ano logoti codoi Yesu. Maje logoti nici amalik rum codoi tōr nōko. Mazi arōŋ kagamit ol nōwō, ⁵² bar ibica niini nōwō kodotek rum cin malkinto o looc, ma adōkōny ŋađinyiny nōko.

Aavi Yesu roonnya

⁵³ Ma avōyi ol Yesu korge o alaan o adikir ceeze o Joowo. Ma alotai alaata o ceez o Joowo kibeen ol o demziinto ki ol o baayizo titiny. ⁵⁴ Maje Pitōr ano Yesu reena, ma ako kaluwawe o kōrōk o alaan o adikir. Ma ako aave goo arome niini kibeen ol o abek kōrōk o alaano. ⁵⁵⁻⁵⁶ Ma ŋinaante odomta alaata o adikir ceeze o Joowo kibeen ol o roonnyo dook oroŋit bacok ci aduwa zōwō ci ger akati Yesu ka kapakteke nōwō daayiz. Bar akōm bacok ci ajowa niigi aduwa gi ci aleema ci akati Yesu, eeci ol ci meelik aduwa vōlōŋ ci akani niini nōwō, bar molokwana cigeec o alaŋ atobō.

⁵⁷⁻⁵⁸ Gōwō ŋaaz ol ogene jena, ma aduwa vōlōŋ ci akatni Yesu azi ne, “Kaziikna iiten baale nōwō azi ne, Kooyoi iiten oma ceez ci Joowo baal eenyca ol ci deer noko. Ma bodo keenyca naana oma iinyaye ceen iiyu nōko calaŋ eeti ci deer anim keteenya.”

⁵⁹ Buk bodo molokwana ci ol nicoko o alaŋ atobō.

⁶⁰ Itiŋa ni alaani o adikir ceeze o Joowo, ma ajin Yesu anek ne, “Akōm dim niina gi ci abariz kaale ci aduwa ol nicigi noko?”

⁶¹ Maje Yesu ajaki, kōkōm gi ci abariz. Bodo ajin alaani nōwō anek ne, “Een niina Kiristo ween Ŋeerti Joowo neen?”

⁶² Ma abedeke Yesu nōwō anek ne, “Aneet neen. Iiten oma acinaŋ aneet Ŋeerti Eeto kaave libire o azo o Jook o Adoi, ma ŋaan acinaŋ katin niiga aneet ŋaati kakune diizwani tammu tadena.”

⁶³ Enico ereec alaani nici rum onin maany bornet nōŋa, ma azi ne, “Alaŋaan bodo karōŋ bacok ci ka kuduktayet gi ci ger agōwō eeti nici. ⁶⁴ Inoko iziiktu niiga momoz cin amomoz niini Jook o. Mayo zin inoko apayeku niiga nōwō naa?”

Ma azi niigi dook ne, “Agano niini kibeen daayiz.”

⁶⁵ Ma oortek ol ogen ɲaatineɛɲ nɔɔnɔ amot, maje ol ogene abunɲ nɔɔnɔ kebere ruma, ma aruk, ma bodo ajin anek ne, “Ol ciganɲ ci arukin o?” Ma anyek niigi nɔɔnɔ ol o beyiinto, ma aruk niigi buk nɔɔnɔ.

Daɲiin o Pitɔr

⁶⁶ Maje Pitɔr ɲaan aavi kaluwawa nɔkɔ. Iiya ni dole ci aligɲiɲonek alaan o adikir. ⁶⁷ Mazi acin Pitɔr ɲaati aave goo noko, egelem niini nɔɔnɔ ɔɔɔt, ma anek ne, “Orkoryu ri buk gɔɔn niina kibeem Yesu ci Nazaret noko.”

⁶⁸ Bar adaɲɲyi niini azi ne, “Alaɲ kazii zɔɔz ci aduwa o.” Ma adun niini akɔ abil araan tatoga. Taman nɔkɔ ɔɔɔk toloci.

⁶⁹ Mazi acin dole bodo Pitɔr, uduwak ol ci aavtiz ɲinaante enek ne, “Eeti nici nuyai ci Yesu.” ⁷⁰ Bar Pitɔr adaɲɲyi bodo.

ɲintimiliny enektek ol ci aavtiz ɲinaante o Pitɔr ne, “ɲɛdet niina een nuyai ci Yesu, eeci een buk niina eet ci Galili.”

⁷¹ Enico uduwa Pitɔr ɲaati itooni Jook gi ci azi ne, “Kaduwa naana gi ci kaleem. Alaɲ kaga eet ci aduwanu o. Mā kalabanunɲ, adakan koca Jooi.”

⁷² Taman nɔkɔ ɔɔɔk toloci bodo, ma aada Pitɔr zɔɔz baal aduwak Yesu nɔɔnɔ baal anek ne, “Adaɲɲyan tiɲeere niina aneet lak iiyu ɲɲaan kɔɔɔk toloci lak ram e.” Mazi aada niini zɔɔz nico, utulu ɔɔɔt ele.

Ajin Pailat Yesu

15 ¹ Ma ɲeere olotai alaata o adikir ceeze o Joowo taman kibeem ol o demziinto kibeem ol o baayizo titiny, ma avu abaaban niigi dook gi ci ka kutuguzek Yesu. Acabit ni niigi nɔɔnɔ azeen, ma avɔyi alaane o kazi Pailat. Niini eet ci ol o Rom, ma abal Judiya. ² Ma ajin Pailat Yesu anek ne, “Ineet alaan o ol o Juz neen?”

Ma abedeke Yesu nɔɔnɔ anek ne, “Neen ci aduwa niina o.”

³ Bodo alaata o ceez o Joowo aduwa kaal ci ger meelik akati Yesu.

⁴ Ma ajin Pailat bodo Yesu anek ne, “Akɔm dim gi ci abariz? Alaɲ azii kaal ci ger akanin ineet aduwa ol noko dook?”

⁵ Buk enico ɔkɔm Yesu gi ci abariz. Makacin abaraɲe Pailat ɔɔ ɔɔɔt.

Apayek Pailat Yesu daayiz

⁶ Maje waanice gɔɔn ma een iiten o adayi ol o Juz dayiin o aadane vardaɲinet, aboroc Pailat eet codoi ole o acabje ci te arɔɔɲ ol nɔɔnɔ koborocai. ⁷ Ma enice anyak eet ci kazi Barabas ci acabje kibeem gɔnɔgi oogi giye ci aborni niigi akuma, ma ayɔwɔ ki takirnya zee makacin uruyit niigi ol koogi kadaayito. ⁸ Olotai ni kɔle, ma avu ajin Pailat ka koborcak niini nɔɔɔgo eet oma eonin gɔɔn agɔɔni laadun iinyaye o gɔɔn aadane ol vardaɲinet.

⁹ Ma ajin niini nɔɔɔgo anek ne, “Arooɲɲanɲ kɔɔgayunɲ alaan o Juz?” ¹⁰ Maje Pailat aga niini alaata o ceez o Joowo anyaa Yesu giye ci olla amadiyi niigi nɔɔnɔ gaga nɔkɔ.

¹¹ Bar alaata o ceez o Joowo otoɲomtek kɔle dook ka kijinit Pailat kotoɲ Yesu, ka koborcak nɔɔɔgo Barabas.

¹² Ma ajin bodo Pailat nɔɔɔgo anek ne, “Ma eet ci awuyu kizi alaan ci ol o Juz o arooɲɲanɲ kutuguwek nɔɔnɔ naa?”

¹³ Ma egereny niigi bodo anɔ ne, “Tɔdɔ nɔɔnɔ kadaak keete ween talakec.”

¹⁴ Ma ajin Pailat nɔɔɔgo anek ne, “Naa? Agɔɔn niini gi ci ger janɲ?”

Bar enico agereny niigi ɔɔɔt kujuk we azi ne, “Tɔdɔ nɔɔnɔ kadaak keete ween talakec.”

¹⁵ Mazin giye o arɔɔɲi Pailat kɔle kataltoi, ɔɔgak niini nɔɔɔgo Barabas. Ma anyek Yesu kuruyit takirnya nyaboyen zee ma vurta anyek nɔɔnɔ takirnya kɔɔt kotodeec kadaak keete ween talakec.

Ararni takirnya Yesu

¹⁶ Ma ayit takirnya Yesu avɔyi ɲaa uneɲ abaayi kaluwawe o kɔɔɔk o Pailat. Ma alotai niigi dook. ¹⁷ Ma avu aborceke Yesu rum ci meeri, ma agɔɔna nyagirgir ceen bila, ma areke nɔɔnɔ ɔɔ. ¹⁸ Ma azaa niigi nɔɔnɔ momozenta anek ne, “Abona alaan o ol o Juz. Rok bai nɔkɔ kodot.” ¹⁹ Ma anyɔne niigi nɔɔnɔ ɲaati aruyi ɔɔ keete ci miliny, ma oortek amot, ma bodo akani kozoɲti looc adiɲɲinan nɔɔnɔ momozenta. ²⁰ Mazi odotiz niigi momozente nico, uburuca ɲaatin rum ona arike nɔɔnɔ e, ma aborceke rumanene ogin laadun. Ma avɔyi nɔɔnɔ kutur bitaala ka kɔɔt kotodeec keete ween talakec.

Adɔdɔ takirnya o Rom Yesu keete ween talakec

²¹ Ma gɔla urumto niigi kibeem eet ci kazi Saiman ci looc o kazi Sariin. Niini baati Alikzandar ki Ruvas. Mazi anowa niini gɔl akunak Jerusalem, agamit takirnya nɔɔnɔ, ma adaɲek kitik keet ween talakec o ka kɔɔt kotodoyi niigi Yesu. ²² Ma anyaa niigi Yesu ɲinti kazi Golgoza o akati keɲ cine amen ci oowu. ²³ Ma anyek niigi nɔɔnɔ nyaan ci acano kibeem agero o kazi mir, ma abor Yesu ɲaati awudi. ²⁴ Otodooc ni niigi nɔɔnɔ keete ween talakec. Ma aar niigi maadico ci ka kiitazake gɔɔn eet co rum cine rumanene o Yesu. ²⁵ Adɔdɔ niigi nɔɔnɔ ziiye ween tɔɔkɔc ɲeere. ²⁶ Ma ayeeet niigi zɔɔz o apayek niigi Yesu azi ne, “Nici alaan o ol o Juz.” Ma amadanek zɔɔz nico waragewa talakec ci adodine Yesu o tadena. ^{27–28} Ma buk adɔdɔ niigi agoryak ceen aamnyok een ram keene ween talaken. Arek codoi Yesu aza, maje codoi arek kaɲeta.

²⁹ Mazi acin ol ci olla awɔ gɔla Yesu, ararni niigi nɔɔnɔ zee ma arurut ooti, ma amomoz anek ne, “Aa. Een ri eet baal azi ne ka ɔyɔk ceez o Joowo, ma bodo eenyca iinyaye ceen iiyu e neen. ³⁰ Rogoz zin di ele. Duna keete nico.”

³¹ Ma ararni buk alaata o ceez o Joowo kibeem ol o demziinto Yesu anɔ ne, “Arogos niini ol oogi doon, bar alaɲ anim korogoz ele onin maany.” ³² Ma anek niigi Yesu ne, “Mā een didi niina Kiristo ween alaan o Israyil neen, duna keete nico. Mā agoon nɔkɔ, katuyin koca naaga ineet.”

Bodo agoryawa o adɔdi ki nɔɔnɔ keene ween talaken e amomoz buk niigi Yesu.

Daayiz o Yesu

³³ Mazi akɔ abil ii boloca, ootozyai lɔɔci dook kizi muur zee been ziik iiyu yomana. ³⁴ Mazi akɔ een ziik iiyu, egereny Yesu molowe ci appe otoge uneɲ azi ne, “Eloi, eloi. Lama Sabaktani.” Ma keɲ ci zɔɔz nico azi ne, Jook onan, Jook onan, oonnan naa?

³⁵ Mazi azii ol ogen ole o aavtiz ɲinaante zɔɔz nico, izito ne, “Iziiyit di! Awo niini Ilija.” ³⁶ Ma adɔkɔny eeti codoi ɲaatineɛɲ, ma ajukek tovot nyaan ci amokcar, ma akat moroka, ma itoonek Yesu ka kococo. Ma anek eeti oman gɔnɔgi ne, “Kereec di ka kicinit karabɔɲ aku Ilija ka kaarak nɔɔnɔ looc.” ³⁷ Enico egereny Yesu bodo molowe ci appe, ma ateeet.

³⁸ Ma areeci rum o gōon abilene ol ceez o Joowo, akani reecinet tadena zee been tir loota.

³⁹ Maje alaani ci takirnyawu abil aḵḵoḵ ḡinti ona adodine Yesu o. Mazi acin niini ḡol o adaakni Yesu been gernyi onin, izi ne, “Didile eeti nici te ḡḡerti Joowo gi.”

⁴⁰ Buk ḡinaante anyak ḡaai ci agelem Yesu reena. Ma ḡaane nicoko aavtiz to Meri o looc o kazi Magdala, ki Salomi, kibeen Meri ween yaati Josev ki Jemis o miliny. ⁴¹ Ma ḡaai nici baale gōon ano niigi Yesu Galiliya, ma atirit nōōō. Ma buk anyak ḡaai ci meel oogi ci baal ḡrkōra ki Yesu avunak Jerusalem.

Ada Josev o Arimatiya Yesu

^{42–43} Ma iitēni nica iiten o gōon aḡorneke ol o Juz liḡliḡōnta, ma aperperani niigi eleeti, eeci tiḡeere een iiten o yubzento kazi Sabit. Mazi ka kizi looci yoman, iya eeti ci kazi Josev ci looc o kazi Arimatiya. Niini alya eet ci abon gōon atitiny ol nōōō ole o roonnyo, ma buk niini are kuni o baliin o Joowo. Ook ni niini ḡaati Pailat moozeta, ma akō aḡin nōōō ka kook kaara ele o Yesu talakeca ka kook kada. ⁴⁴ Ma abiiir Pailat ḡo giye ci adaayi Yesu kataman o, ma awa alaana o takirnyawu, ma aḡin nōōō ka kuduwak mā adaak Yesu. ⁴⁵ Mazi akō azii Pailat adaak Yesu didi, anyewun Josev kook kaara ele o Yesu talakeca. ⁴⁶ Ma ataala Josev rum ci abon, ma akō aara niini ele o Yesu keete ween talakec, ma aku atuuzek rum nico. Ma akō arek bōōt ci adayai biya, ma abōrbōrana be ci appe, ma anyoogi bōōt otok. ⁴⁷ Maje Meri o looc o kazi Magdala kibeen Meri yaati Josev agelem ḡinti aronek ele ci Yesu o nōko.

Urugun Yesu bodo daayiza

16 ¹ Mazi akō aḡorneke iitēni o yubzento kazi Sabit, ḡōōt Meri o looc o Magdala ki Salomi kibeen Meri ween yaati Jemis, ma avo ataala karkar ci aḡol madiz ka kōōt kuḡuutek ele o Yesu bōōta. ² Ma iitene o yubzento ḡeere ririwōna ḡōōō ḡōta bōōta. ³ Mazi ḡaan awō ḡōla nōko, izito ne, “Mayo tedec apiyaket be o appe o bōōt otoga ḡene?” ⁴ Bar mazi avo agelem bōōt, acin be ipiyai kizi vōlōḡ bōōt ḡōḡi nōko. ⁵ Mazi avo niigi bōōta eecito, acin eet ci ḡaan een logoz ci aavi bōōt libire ci azo o anyak niini rum ci vōō. Ma abiiir nōōḡo ooti ḡōōt.

⁶ Ma anek niini nōōḡo ne, “Mā anyeku kibiirtuḡ ooti gaga. Kagayuḡ nōko arooḡnyu Yesu o Nazaret baal adodi keete ween talakec e. Urugun zin niini bodo daayiza. Aziito ḡina. Icinit di ḡin baal arek ol nōōō e nici. ⁷ Bar ḡōōt ka ḡōt uduktak nuyak ogin kibeen Pitōr buk. ḡōōt enektek nōōḡo ne, Araye Yesu ḡaatunooḡ ook Galiliya. ḡaan avo acinu tedec niiga nōōō ḡinaante kiyo baale aduwakuḡ niini igeet e.”

⁸ Uduḡta ni niigi bōōta, ma adōkōny, eeci abiiir nōōḡo ooti, ma aḡole looc ḡōōt. Ma ḡaan buk kuduktak niigi ol oogi zōōz nico, eeci anyak niigi ḡoliin ḡōōt.

Ayelzek Yesu ele Meri o Magdala

⁹ Mazi akō ḡaaz Yesu daayiza iitene o yubzento ḡeere, eyelizak niini ele rak ḡōwa Meri o looc o Magdala baal atōōk Yesu ḡaatin miniḡ o Loryento een torgerem e. ¹⁰ Ook ni niini uduwak nuyak o Yesu ḡaati aavtiye aluwi daayiz onin. ¹¹ Bar mazi akō azii niigi zōōz o orogi Yesu bodo, ma ayelzake ele ḡaa nico ḡaan niigi kutuweec zōōz nico nōko.

Ayelzak Yesu ele nuyak ram

¹² Ma bodo vurta eyeliza Yesu ele alye ci awō doon ole ceen nuyak een ram ci avu Jerusalem. ¹³ Ma amiiri ol nicigi, ma avo aduwak ḡōōḡi, bar ni buk ol nici alaḡ atu zōōz nico.

¹⁴ Ma vurta eyelizak ni niini ele nuyak ween amōōt codoi ḡaati adayin. Ma agernyek niini nōōḡo giye ci bakbayini zinzeeti, ma akōmni tuwen o, eeci alaḡ atu niigi zōōz ci ol o icinit nōōō ḡaao orogi niini daayiza.

¹⁵ Enek ni niini nōōḡo ne, “ḡōōt ozobit loocok dook uuwaktek kaviyak o Joowo moden dook. ¹⁶ Mā eeti ci atuwe, ma oonyi, arogi niini waanma. Maje eeti calaḡ atuwe apawonek waanma nōōō gerzitin. ¹⁷ Ma ol o atuwe kanyi waanma naana nōōḡo ḡōyiz ci atōōyi miniḡ o Loryento ḡla zaare ogan. Ma kanyi buk nōōḡo ḡōyiz ci azōōzi utugetine ci ḡaan laadun niigi kagaac. ¹⁸ Mā adōḡa niigi kowanya azeene, alaḡ adak kowanya nōōḡo. Mā awot agero o aruk ol kadaayito, alaḡ adaai. Mā ataadek azeen ol ci amōōr, arogi ol nici mōōrizoi.”

Odoḡek Jooi Yesu tammu taden

¹⁹ Mazi akō odotiz Manyi Yesu zōōza, odoḡek Jooi nōōō tammu tadena, ma akō aavi niini libire o Joowo azo.

²⁰ Itiḡgazo ni nuyawa, ma avo uuwak loocowe dook. Ma atirit Manyi nōōḡo, ma ayelzai uuwayi uneeḡ kizi didi kaale o atēet ol biye agōōn niigi.